

ASO LULU, 28 IUNI 2023

Na nofoia e le Fofoga Fetalai le Nofoa i le itula e 9:30 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoao Faitulafono.

Ou te ofo alofa ma faatalofa atu i le paia o le Palemene i lenei taeao fou. I le afio o lau Afioga i le Taitai o le Malo lau Afioga i le Tamaitai Palemia, afio lau Afioga i le Sui Palemia, tainane foi le afifio o alii ma tamaitai Minisita o le Kapeneta. E faapea foi a outou Afioga i Minisita Lagolago.

Afio lau Afioga i le Taitai o le Itu Agai ma sui usufono mamalu uma o le Palemene. Sa o tatou lafoai lava i le alofa o le Atua lenei taeao, ae faafetai i Lana pule faasoifua ua ia faataumamao puapuaga ma faigata, a ua ia aumaia laolao toafilemu, o lea ua tatou toe fesilafai ai i manu ma ao o Malo. Foi pea ia le viiga ia te Ia, malo le soifua manuia malo le lagi e mama.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a le tatou Malo, taeao manuia. Faamalo le onosai mai mo le lagolagoina o a tatou tualumaga.

Samoa ma lau faafofoga tapuai mai, matou te faatalofa atu i le Suafa manumalo o Iesu Keriso, malo le soifua manuia i lenei taeao fou. Tapuai maia ma le manuia.

I lenei aso ma le alofaiva o le tatou Maota, tatou lalafo i le Atua mea uma, o Ia e ou le valaauina, ua na o Ia foi e maua ai lo tatou fesoasoani a o se ai mo si o tatou atunuu o lo o tapuai mai o tatou faiva. Tau ina ia i ai le faauuga mana a le Atua i le usugafono a lau Afioga i le Palemia ma le Kapeneta ae faapea foi sui usufono mamalu uma o le tatou Palemene.

TULAFONO TAU FAAOFI O LE FAATATAUINA O TUPE 2023/2024 – felafolafoaiga faaauau i luga o le faitauga faalua – Aso Fono Iona 7

FOFOGA FETALAI: Ia, e i ai le manatu o le Fofoga Fetalai ae tatou te le i oo atu i le taimi o le Taitaifono, ia e i ai si mataupu lea na tuuina mai e le sui usufono mamalu mai Siumu. Ou te manatu o felafolafoaiga i le aso

ananafi, ae ao foi ona faamanino ma... Tuu atu le avanoa i lau Afioga i le sui usufono mamalu mai Siumu.

Tofa Hon Tuuu Anasii Leota (Siumu): Faafetai tele i lau Afioga i le Fofoga Fetalai mo le avanoa. Ia, o paia o le taeao ma le aso o le a le oo lava i ai se manatu ona o le manumanu i le tatou taimi. Na o le viiga lava o le Atua aua o Lana Afio e paia, e paia e paia lava lea e tumau e faavavau.

A o lou tulai atu ma lou faaaloalo i lau Afioga i le Fofoga o le Fono aemaise o le paia maualuga o le Maota, ona o se tuuaiga matuia ma mamafa na tuuina mai e le Taitai o le Itu e Agaia le Malo. Sa ou le i tali manino atu foi i ai ananafi lau Afioga ona o lea e faafofoga le Palemene, faafofoga Samoa, faafofoga mai foi lou itumalo i le faapea mai o au na ou sainia le vaalele o le Joint Venture lea ma le Virgin Blue, e pei e foliga mai o au ua ou sainia ni feagaiga e gau, e faaletonu.

Ae lau Afioga, se ou te ofo i le le manatua e le Taitai, o le tatou faigamalo, a le avanoa se Minisita, e foi uma lava i le Palemia o ia o le taitai na te tauavea tiute o so o se Minisita. E le pei o le mea lea ua ou vaai atu nei i ai, a le avanoa le Minisita ua tauave e le isi Minisita. Ae ou te tautino atu ana faapea na ou sainia ma faia le mea ou te manao i ai, faapenei ua 100 ni tatou vaalele.

Lau Afioga, o le mea lena o lea e tulai mai ai, e le i... ou te le i iloa se taimi na tuuina mai ai ia te au se tauaveina o ni mataupu tau vaalele. Pau lava mea sa ou aafia ai, o feagaiga tau tiute ma lafoga. Ae ou te masalo po ua faalua pe ua faatolu ona saunoa le Taitai o le Itu Agai, e tuuai mai ia te au, ia, na leaga le vaalele talu oe. Ae lau Afioga e pei e matuia ia tuuaiga.

O lea la ou te faatu atu ai se lafo lau Afioga, e aumai ni faamaoniga i le mea lea pe afai o au. Afai o au na ou sainia, ia, o mea faapenei, o se faaiuga a le Kapeneta e faia e se Minisita its all collective Cabinet decision, its not a one man e faia e se Minisita se faaiuga. Ae leaga o lea ua aumai nei pei ua faalogo le atunuu, oi, e tautala lava le alii le la i vaalele na ia sainia nei mea e gau ai vaalele. Ae o le agaga lava ia sa tatou taumafai i ai, ia e faufautua i ni mea e lelei ai. O lea foi ua ou faalogo atu nei, e tele mea ia ua e aoai i o. Aisea na e le fautua ai i le tatou faigamalo, semeamanu faapenei ua lelei. A o lea foi ua e saunoa atu, e le o le taimi lenei, a o se taimi mulimuli ane.

Ia pei o mea na lau Afioga e faatu atu ai se lafo, *Ia aumai i lumamea nei se faamaoniga o le tuuaiga lea.*

Ma lou faaaloalo.

FOFOGA FETALAI: Ia, e lelei ona ou faailoa atu pea i lau Afioga i le sui usufono mamalu faamaumauga o le tatou Fono, ina ne i te i ua faamamafa i lou finagalo, ae lelei pea lou tolaulau atu pea o le saunoaga a le Taitai o le Itu Agai, ia ona fua mai foi lea i ai o lou finagalo.

O lea ua saunoa le Afioga i le sui usufono mamalu o lea ua taua foi le tatou faipaaga foi lea ma le Virgin Blue. Ou te manatua le Paeaiga lena sa ou nofo mai luga i o ae saofai i luma i i o le Minisita. O ia le Minisita na faia le faigapaaga la na fai mai na gau, le Minisita le la lea na faipaaga ma le Virgin Blue, a o lea ua uma tatou matamata ai ina ua taunuu mai le vaalele i Faleolo. Ia, o lea e faafofoga mai lau Afioga i le sui usufono mamalu e le o i ai se upu sainia se feagaiga, ae sa taulamua i le faigapaaga. O le mea lea o lea e te faagaulemalie ai lau Afioga?

Tofa Hon Tuuu Anasii Leota: Ia, ua faapena ia ona fai. O le faasaoga o faamaumauga, o lea ua aveese le sainia, ae faapea sa ou i ai i le faiga lea. Ma lou faaaloalo lava, ae faafetai mo lou avanoa. Ae sese la le mea lea e faapea ua tusi mai sa ou nofo i i, sa ou nofo i i, o aao ia o le alii sa tauave, fai mai o i sa ou nofo ai, a o o sa ou nofo ai. Faafetai.

FOFOGA FETALAI: Malo faafetai. Ia o le mea taua lava o le malamalama o lau Afioga, leaga e le mafai lava ona aveese tatou faamaumauga ma saunoaga a sui usufono mamalu, e faamaumau lelei lava, aua la taimi faapea. Ae faafetai pe afai ua faamalieina lou finagalo. Malo lava faafetai.

E tolopo tatou Taualumaga o le Fono Aoao ananafi ua maea saunoa le Taitai o le Itu Agai. Ia, o le avanoa lena lau Afioga i le Taitaifono, tulai maia ina saunoa aua foi le aotelega o la outou Lipoti, ia ma nisi foi o mea na lagalaga e sui usufono mamalu. Lau Afioga i le Taitaifono.

Afioga FALEOMAVEGA TITIMAEA TAFUA (Aleipata Itupa i Lalo, Taitaifono o le Komiti o Tupe Maua ma Tupe Totogi): Faafetai mo le matou avanoa lau Afioga i le Fofoga Fetalai. Tatou te auai e tusa o le taulaga na e siitia i lena taeao i le tatou vatapuia ma lo tatou Matai i le Lagi.

Lau Afioga i le Fofoga Fetalai, faafetai mo lou avanoa, ua e tapa tulia i le tata aua le alofa le mavae o le Atua ia i tatou, ua malama i ulugalua ae taia i le vaai le malu o le tapuiea, e le gata i le Maota Fono o Samoa i ona tulaga mamalu, ae faapea foi ona seetaga malu i malae faitauina o Samoa o lo o luulau ai le onesa ma lafo i le onesaa, aua le tapuaiga mamalu a Samoa. Ae se i faaleo se motugaafa e tusa o le galuega fita sa feagai ai ma le matou Komiti.

Lau Afioga i le Fofoga Fetalai, a o le i sii lou vaa e aga i le au, e muamua ia ona ou tapui le tapu a Tupolesava e pei o le fetalaiga i le Taotolima a Galumalemana i paia faaufigata ma mamalu faalanugata o lena Maota ma le Malae o Tiafau. Ou te faatulou i le faafogafoga tapuai mai a le Afioga i Le Ao Mamalu o le Malo ma Lana Masiofo, ae tainane le Sui o le Fono a Sui Tofia ma lona Faletua. Lau Afioga i le Fofoga Fetalai o le Maota, Afioga i le Tamaitai Palemia o le Taitai foi o le Maota, le mamalu i le Aiga Kapeneta,

le Taitai o le Itu Agai, Minisita Lagolago, Taitaifono o Komiti Faa-Palemene ae tainane le mamalu o sui usufono mamalu uma o le Palemene o Samoa.

Ou te faatulou atu foi i le afio o le Afioga i le Faamasino Sili ma lona faletua, le Peresetene o le Faamasinoga o Fanua ma Suafa, alii ma tamaitai Faamasino. O le maualuga lea o itutino fefaatauagai e le soona oo i ai se leo.

O paia aua le afifio o Aiga ma o latou Tama, Tama ma o latou Aiga, Tumua ma Pule, Ituau ma Alataua, Aiga i le Tai ma le Vaa o Fonoti. O mamalu ia e leai se isi e toe paopaina faatupemuli o taulafoga, aua ua taoto lava a o se alaoo.

E fia oo foi se faatalofa i o tatou uso i le Motu i Sasae. O paia aua le tafatolu fefaatauagai o le faigamalo a Tutuila ma Manua, ae matua ia le tuu i Aiga Sa Levi, i le afifio o Taitai o Ekalesia e fia ma o latou faletua i Samoa nei ma atunuu e mamao o lo o nonomanu aua Samoa ma lana folauga.

Lau Afioga i le Fofoga Fetalai, ona ou oo mai lea i le Tala Faatatau Autu o Tupe mo le Tausaga Faaletupe e amata mai le aso 1 o Iulai 2023 seia oo atu i le aso 30 Iuni 2024 e pei ona folasia ai i le Maota le Lipoti a lenei Komiti. O lo o taulai le silasila a le Malo e ala i lenei Tala Faatatau Autu o le Tupe 2023/2024 i le tapueina ma faamautuina o alamanuia e gafataulimaina mo le soifua manuia lautele.

Lau Afioga i le Fofoga Fetalai, e 4 vaega tetele o lo o ave i ai le faamuamua mo le Tala Faatatau Autu o le Tupe 2023/2024.

1. Siitaga o Totogi mo tagata faigaluega a le Malo.
2. \$51 miliona mo atinae o itumalo.
3. Tapenaga o le Fono a Taitai o Malo o le Taupulega.
4. Ma le faaauauina o le faatinoga o atinae tetele a le Malo.

Lau Afioga i le Fofoga Fetalai, o lo o folasia i le Lipoti a lenei Komiti i le vaaiga aoatetele i lenei Tala Faatatau Autu o le Tupe 2023/2024. E na ona ou toe faatepa lenei Maota i le auivi o le Tala Faatatau Autu o le Tupe 2023/2024 i ana tupe maua ma tupe faaalu a le Malo Tutoatasi o Samoa.

Tupe Maua: I le Tala Faatatau Autu o Tupe 2023/2024 ua faatatauina ai Tupe Maua e \$895.5 miliona ma e \$97.3 miliona ua siitia ai pe a faatusa i le \$798.1 miliona i le 2022/2023. O Tupe Maua i totonu o le atunuu - Domestic Revenue, ua faatatauina ai le \$730.1 miliona i le 2023/2024. Ma e \$79.8 miliona ua siitia ai pe a faatusa i le \$650.3 miliona i le 2022/2023, e aofia ai ma Tala Faatatau Faaopopo o Tupe.

O Tupe Faameaalofa mai Paaga, External Grants ua faatatauina ai le \$165.3 miliona i le 2023/2024. Ma e \$17.5 miliona ua siitia ai pe a faatusa i le tupe e \$147.8 miliona i le 2022/2023 e aofia ai ma Tala Faatatau Faaopopo o Tupe. E 12% ua faamoemoe e siitia ai tupe maua i totonu o le atunuu mai le faatupulaia o lafoga aoina e tusa ma le 13% e aofia ai ma le siitaga lautele o totogi o le aufaigaluega a le Malo. E ui i lona faaitiitia o tupe maua e ese mai lafoga e tusa ma le 1%.

Tupe Faaalu: Lau Afioga i le Fofoga Fetalai, o le aotelega o tupe faaalu faatatauina i le 2023/2024, e \$1.08 piliona. Ma e \$110.1 miliona ua siitia ai tupe faaalu pe a faatusa i le \$971.05 miliona i le 2022/2023.

Tupe Alu Faaletulafono, e \$157.4 miliona. Tupe Alu i Polokalame e \$759.2 miliona. Tupe Alu le Fuafuaina, e \$22.7 miliona. Tupe Alu i Atinae, e \$141.7 miliona. Lea e maua ai le aofaiga o le \$1.08 piliona, o tupe faaalu faatatau mo le Tala Faatatau Autu o le Tupe 2023/2024.

Lau Afioga i le Fofoga Fetalai, o le Tala Faatatau o le Tupe 2023/2024, e \$939.4 miliona ua faatatauina mo galuega masani. Ma ua siitia ai tupe faaalu i le \$54.2 miliona pe a faatusa i le Tala Faatatau Autu o Tupe 2022/2023, e aofia ai ma Tala Faatatau Faaopoopo.

I Tupe Alu le Fuafuaina, ua faatatauina i le 2023/2024 le \$22.7 miliona, ma o se siitaga e \$968,366 pe a faatusa i le \$21.8 i le 2022/2023.

E \$141.7 miliona tupe faatatauina mo atinae tetele a le Malo 2023/2024, ma e \$57.1 miliona ua siitia ai pe a faatusa i le \$84.5 miliona i le 2022/2023.

Lau Afioga i le Fofoga Fetalai, e tusa ai ma iloiloga a le Komiti i luga o lenei Tala Faatatau Autu o le Tupe 2023/2024, na matauina ai e le Komiti le sologa lelei pea o le faatinoga o galuega, o faiga faavae tau tupe e pei ona fuafuaina i lenei tausaga faaletupe. E le gata o le mulimulitaia o faiga faavae tau tupe, a o le toe faaauuina o poloketi o atinae tetele a le Malo, lea na taofia talu mai le aafiaga o le Koviti-19.

O lo o atagia foi i lenei Tala Faatatau Autu o le Tupe le mataitu lelei e le Matagaluega o Tupe faatasi ai ma paaga o le vaega maoti o tupe tapenaga maeaea a le Malo e tali atu ai i ni tulaga maaleale o le tamaoiga, faatasi ai ma le sauni atu i tapenaga mo le taligamalo o le Fono a Taitai o Taupulega i le tausaga fou. E ui i le matauina o le laitiiti o tupe maua ae tele tatou tupe faaalu, o le itu taua ma le itu lelei foi o lea tulaga, o le uunaia ai o le aufaigaluega o Matagaluega ma Ofisa o le Malo e ao mai tupe e tatau ona totogi mai i le faatinoina o auaunaga ma a latou galuega masani.

O le isi foi tulaga taua o le faasili o tupe alu nai lo tupe maua, o le maua ai o le avanoa o Matagaluega ma Ofisa e toe fetuunai le faasoia i le faaaogaina o tupe mo nisi punaoa fou po o alamanuia aua le faaleleia o le auaunaga o latou galuega faatino.

E faaleo foi le agaga faafetai o le Komiti ona o lo o atagia i lenei Tala Faatatau Autu o le Tupe 2023/2024 le siitaga o totogi o tagata faigaluega a le Malo ina ia ogatasi ma le tau o le soifuaga ua i ai nei. O se suiga e manatu le Komiti ua talafeagai, e uunaia ai foi le siitia o le auaunaga a le aufaigaluega ma Ofisa o le Malo i le faatinoina o latou galuega faatino.

Lau Afioga i le Fofoga Fetalai, o le pulea lelei o tupe a le Malo, o le sao o le vaega e tatau ona ave i ai le faamuamua, o le faasoia, faapea suiga talafeagai mo auaunaga a Ofisa o le Malo mo le lagolagosua o faiga faavae tau tupe. O se faavae mautu lea e fau ai se tamaoiga mausali mo le lumanai. O suiga talafeagai mo auaunaga a Ofisa o le Malo mo le lagolagosua o faiga

faavae tau tupe, e ogatasi lelei lea ma le nauanautaiga ma fautuaga a le Komiti na ave i Matagaluega, Faalapotopotoga ma Ofisa uma o le Malo, ina ia faataua le manino o fua faatatau o le faatinoga o ia galuega, ina ia mautinoa o lo o ogatasi tupe alu ua faatatauina mo Matagaluega ma Ofisa mo tausaga taitasi, ma galuega faatino ua faataatitia mai.

E talitonu le Komiti a lelei ona faataatitia taiala ma fuafua o galuega a Matagaluega ma Ofisa taitasi, o le a faigofie foi ona fua ai a latou galuega faatino ma faataatitia ni matatia e tatau ona ausia e Matagaluega ma Ofisa a le Malo. E taua foi le vaega pe a oo i le taimi e faatino ai le galuega a le Pule ma Suetusi Sili Aoao i le suesueina o le faaaogaina o tupe a le Malo. Ia iloilo ma suesue vaegatupe alu na faatatauina mo Matagaluega ma Ofisa, pe na faaaogatatau le tupe i lalo o faiga faavae tau tupe. O le mafuaaga lea o le faataua e le Komiti o lea vaega, ina ia mautinoa le ausia e Matagaluega ma Ofisa o le Malo o galuega na fuafuaina e faatino i le tausaga ina ia mautinoa o lo o ogatasi ma tupe na faatatauina mo lea tausaga, ma ia mautinoa le ausia o taiala mo le atinae manuia o Samoa.

Lau Afioga i le Fofoga Fetalai, na matauina e le Komiti le tapenaina lelei o le Tala Faatatau Autu o le Tupe. E momoli atu ai le agaga faafetai tele i Matagaluega uma a le Malo ma Faalapotopotoga Tumaoti i le lelei ma le maeaea ona tapenaina o le Tala o le Tupe. Faamalo le galulue punouai ma le faamaoni i lo outou valaauina, aua o outou lava o le lumanai o Samoa e tou te faaaauina galuega lelei o lo o taumafai atu ai le tatou Malo.

E momoli atu foi le faafetai i le Matagaluega o Tupe i lau Afioga i le Ofisa Sili o Pulega ma le afaigaluega mo le galuega fita i le tuufaatasia o le Tala o le Tupe, e le faigofie le tau faasoasoina o vaegatupe mo Matagaluega ma Ofisa taitasi a le Malo ona o le utiuti o le Tala Faatatau o Tupe 2023/2024 ae faamalo le galulue ma le faasoa lelei.

Lau Afioga i le Fofoga Fetalai, ou te fia tali atu i nisi o fesili a sui usufono e tusa ai o sailiiliga a le Komiti le Tala Faatatau Autu o Tupe.

Na fesiligia e nisi o sui usufono mamalu le vaegatupe na faatatauina mo le tatou Ofisa lea e Sulufai i ai tatou alo ma fanau, i le faatupulaia pea o le fuainumea. A o le tali, ona o le faatuputupulaia pea o le fuainumera o tagata o lo o sulufai i lea nofoaga, e tatau ai ona tuusao lea vaegatupe latou te faasoaina lona faaaogaina ma tuuina mai le faaaogaina o tupe, nai lo le faatonu mai e le Matagaluega o Tina ma Tamaitai o le faaaogaina o lea vaegatupe.

I sailiiliga a le Komiti na maua ai le faaaogaina lava o le tupe ua faatatauina mo le vaega o alo ma fanau o lo o latou tausia, o lo o faasoa lava e latou le faaaogaina. O lo o manino lava i totonu o le latou MOU na sainia ma le Matagaluega o Tupe i vaega taitasi e faaalu ma faasoa i ai le vaegatupe. Na fesiligia e nisi o sui usufono se tala lata mai i le masini faata faapitua, le tatou container x-ray scanner i le Matagaluega o Tiute ma Tupe Maua aua le faatinoina o galuega a le Matagaluega i le suesueina ma le mataituina o le

aumai faanana ma faasolitulafono o fualaa faasaina ma auupega malosi i totonu o le atunuu. Na faailoa mai e le Matagaluega i le Komiti o le masina o Fepuari i le tausaga fou ua faamoemoe e taunuu mai ai lenei masini faata faapitoa, ma o lo o fua foi i le maea ona fausia o le fale o Pulega o Uafu ma Taulaga i le nofoaga o lo o faamoemoe e tuu ai le masini faata.

Na i ai foi nisi o sui usufono na latou fesiligia i tatou seleni ia o le poloketi tai \$1 miliona po o le a se tulaga ua oo i ai tatou... O le tali atu i le matou feiloaiga ma le Matagaluega, o lo o i ai le account faapitoa, le teugatupe faapitoa o lo o teu ai ia vaegatupe, a oo i le taimi e lava ai ona tapena mea o lo o manaomia e le Ofisa, ia ona faagasolo ai lea o le toe faaauauina.

Na fesiligia e isi sui usufono Taitai o le Malo i Taupulega i le tausaga fou po o le a le vaevaeina o le \$20 miliona ua faamatu muamua mai mo tapenaga o taligamalo. O se vaega tetele nei o faamoemoe e faaaogaina ai nei vaegatupe e \$20 miliona aua tapenaga mo le taligamalo a Samoa i le Fonotaga a Faauluuluga o Malo o le Taupulega po o le CHOGM. Muamua, puipuiga ma le saogalemu, o le safety and security. Auaunaga a leoleo aua le puipuiga o Taitai, tulaga manaomia mo puipuiga o tuaoi faava-o-Malo, malae vaalele, uafu ma le tatou custom, quarantine.

Lona lua o le soifua maloloina, faalavelave tutupu faafuasei. Tapenaga a le Matagaluega o le Soifua Maloloina, tapenaga a le FESA mo faalavelave tutupu faafuasei. O fale mo potu fonu e aofia ai le toe faaleleia o le TATTE ma le TOOA SALAMASINA, faatasi ai ma le tapenaina o isi fale o le a faaaogaina mo lenei usugafono. O fesoootaiga, o le faaleleia o tulaga manaomia aua fesoootaiga i le taimi o fonotaga. O le tuufaatasia o auivi ma fuafuaga, mo fesoootaiga i le va o Faalapotopotoga uma ma Ofisa o le a taimua i le taligamalo.

O auala ma atinae tetele, tapena ma le faaleleia o auala, laina eletise ma le suavai, ina ia mautinoa le sologa lelei uma o faigamalaga ma auaunaga i le taimi e faatino ai le fonotaga. O le tapenaina lelei o mataaga mo asiasiga a le tupu o Peretania, ma isi taitai. O apitaga ia lelei ma lava tapena, ma le saogalemu o fale apitaga o le a faaaogaina mo taitai o Malo o le Taupulega.

Mo le silafia i le taimi nei, o lo o faatalanoa pea paaga masani a le Malo, mo atinae donors mo ni a latou fesoasoani mo vaega o lo o tau ai luga. Ma le faamoemoe o a lava vaega o le a oo i ai le fesoasoani a nei paaga, o le a faasafua atu i ai le vaegatupe e \$20 miliona. O lo o faaagaga, ae o le taimi nei, o le vaai taulai a le Matagaluega o tupe, e ono oo atu i le \$50 miliona, se tau aofia o tapenaga a le Malo.

Na fesiligia e nisi sui usufono le iloiloga a le Komisi o le aufaigaluega a le Malo, i se tala lata mai po o afea e faamaea ai le iloiloga. Ona o le tele o avanoa. O lo o fesiligia foi e nisi o vaega, faapea foi ma nisi o vaega o pasene i le siitaga o totogi o tagata faigaluega a le Malo.

O le faatinoga o totogi mo le faatupeina o le... E toe faapupula atili i le faatinoga o siitaga o totogi a le Malo, o lo o fuafuaina mo le masina fou, po

o le tausaga faaletupe 2023/2024, e pei ona laga e nisi o sui usufono mamalu.

E pei ona folasia i le lauga a le Minisita o Tupe, e lua tausaga faaletupe, o le a faatinoina ai lenei siitaga. Ou te ioe foi ma talitonu i le fesili na tuuina mai, e malamalama lelei lava le na aumaia le fesili lea. O tatou siitaga faale-Malo, e le i i ai lava se siitaga e tasi se tausaga na fai ai. O le faatinoina o le siitaga 2023/2024, e lua tausaga.

Ma o le vaeveaga lenei, o le sau mai le totogi o le principal level agai i lalo, e 7% le 2023/2024, ae 3% e faamaea i le 24/25. O le ACEO level, o le totogi i luga atu o le principal level, laititi i le CEO, e i lalo ifo o le CEO, e 3% 2023/2024 ae 2% le 2024/2025, ona atoa ai lea o le 5%. E faapena foi i le vaega lea e i lalo e amata mai i le principal level agai i lalo, le 10%. O Ofisa Sili o Pulega o Matagaluega, o tofiga taualoa a le Malo, e 2% le 2023/2024, ae 1% le 2024/2025. Mo le auiliiliga atu o faatinoga o sailiiliga o totogi faatausaga fou 2023 i le lipoti a le tatou Komiti.

Lau afioga i le Fofoga Fetalai, o le faafesili a nisi o sui usufono, i le faatupeina o lenei siitaga, e avatu ai se tali aotelega. O le faatupega, ou te iloa e manino i le tali atu a le Minisita e aafiatonu i ai le tulaga lea o le ACC, le afioga i le Minisita, i se taimi pe a oo atu i ai lana tali.

Na fesiligia le Forensic Audit, o se tali i le mafuaaga faatalatalanoaina o le mafuaga na le faataunuuina ai lea fuafuaga. Na faagasolo tauofoga mo lea galuega, na amata mai ia Novema ina ua maea le tuufatasiga uma o pepa o galuega, faapea ma pepa o faamatalaga mo tauofoga. Na i ai talosaga e toe tuu i tua le aso, due date extension, e tapunia ai tauofoga, ma faapea lava ona fai. Na faaauau ai faatalatalanoaga ma iloilogia a le komiti faapitoa, e tau mai i le masina o Me. Aepeitai e le i mafai ona faamalieina le kamupani e tasi, i nisi o vaega manaomia i pepa o galuega. Ma aveai ai loa le faatuatuaga a le Komiti o Tauofoga, ina ia toe faasalalau lenei galuega. O lea ua maea ona toe faasalalauina i le aso 16 Iuni, faasalalau tuusao i kamupani sa faaalua lo latou naunautaiga e toe tauofo mai, e tusa ma fesuaiga ma teuteuga o pepa o galuega. O le ala lea o le faaogaina o le \$500,000 o le siitia i le miliona o le tupe faatatau mo le tausaga faaletupe fou e afua lea, ona ua mafai ona atagia mai, tau faataitai o ia galuega. Ma o le naunautaiga o le a faatinoina uma e tausaga faaletupe fou.

O le fesiligia o le tatou export authority, o lo o maua o lo o i ai le isi vaegatupe na faatatau mo le faalapotopotoga o Esetete Tausi, o lea e maua ai le faatuina o le export authority.

FOFOGA FETALAI: Ia malie lau afioga i le Taitaifono... e i ai se mea... faailoa mai se mea o...

Afioga Peseta Vaifou Tevagaena (Faasaleleaga 3): Ia faafetai tele lava i lau Afioga i le Fofoga Fetalai, e momoli foi le faafetai tele i lau afioga i le

Taitaifono ona o tulaga o lea ua oo i ai le faamalamalamaina o le tala o le tupe. O le vaega tonu lava lea sa ou fesiligia ai le tulaga lea o le forensic audit, ona o le miliona tala. O lea e matau atu i le lipoti, o le miliona lea o le a toe faatea atu, e faaauau ai ia saililiga. A o lea ua saunoa mai lau afioga i le Taitaifono, ua faaleaogaina le 500 muamua. O le ala lea, e pei e feteenai ia lau foi matau atu, e foliga mai la, e le i faaogaina le 500 lea sa... i le tala o le tupe 2022/2023. A o lea ua sau i le tala o le tupe lea 2023/2024, o lea ua toe avatu le isi miliona. O lea ua faafofoga le Maota ma le mamalu o le Palemene, o lea ua aumai lau saunoaga, e le i faaogaina le...

FOFOGA FETALAI: O lea ua maua atu... o la lava e manino le saunoaga a le Taitaifono, ou te ofo foi au ia te oe, o la ua manino. O la ua toe... Se i tulai mai lau afioga i le Minisita o Galuega Tetele.

Tofa Hon Olo Fiti Afoa Vaai (Minisita mo Galuega, Felauaiga ma Atinae Eseeese): Lau Afioaga i le Fofoga Fetalai, e tau faamalamalama atu le mataupu lea, ona o i le Tenders Board na fai ai le suiga lea. O le \$500,000 muamua lea sa avatu muamua, sa faapea e na o le tasi le kamupani Forensic, e faia le forensic audit. Ae peitai o lea sa toe fai le fesuiaiga, a le Tenders Board, ona o le tuai pe a tasi le kamupani. Ona faalua ai loa lea o kamupani ina ia vave le galuega. O lae na avatu ai loa ma le isi \$500,000 lena, lea o lo o i ai le miliona i le taimi nei. Ma le faaaloalo.

FOFOGA FETALAI: Pe ua faamalieina le sui usufono.

Afioga Peseta Vaifou Tevagaena: Faafetai tele lava lau afioga o lea la ua ou malamalama. E momoli atu le faafetai tele i lau afioga i le Taitaifono o lea ua malamalama lou sui usufono, faafetai.

FOFOGA FETALAI: Ia faaauau le saunoaga a lau afioga i le Taitaifono.

Afioga FALEOMAVAEGA TITIMAEA TAFUA: Ia malo faafetai mo le fesili, o lena ua tali atu e le Minisita, o le a le toe oo foi i ai se faamatalaga.

O le faatalanoaga o le export authority, tatou seleni lea... Mo saililiga a le Komiti, ua taatitia fuafuaga a le Malo, e toe faatulaga matafaioi tauave a le Faalapotopotoga Esetete Tausi a Samoa.

O lea faatulagaga, ua i ai le fuafuaga e tauave faatasi, e le Faalapotopotoga matafaioi a le STEC faatasi ai ma matafaioi a le Samoa Export Authority. O le ala lea ua faatatauina ai le \$500,000 i ai, i lea auala atu i le MPE. E mo le silafia, o nisi o galuega faapisinisi sa faatautaia e le STEC, ua i ai le fuafuaga e faaese atu i pisinisi tumaoti, le aufaipisinisi, latou te tauaveina. E pei o le vilimaa, o le biomass, ma le faatautaia o faatoaga. E pau le galuega

o le a taulai i ai le STEC i le ofisa, i lona faatinoina o le mataitu o le lisiina atu o latou fanua, faatasi ma le pulea lelei o le Export Authority.

Lau Afioga i le Fofoga Fetalai, ou te talitonu, a i ai nisi fesili e le i avatua tali, o lea ua i ai ma lava tapena ia Minisita e tali atu i nisi o fesili, pe afai e le i faamalieina lou finagalo i tali a le Komiti.

Lau Afioga i le Fofoga Fetalai, e leai ni manaoga o lenei itumalo, o lena ua maea ona saunoa atu se tasi o tuafafine o ma toa lua i le tele o vaega. Ua lava foi lea, aua e ioe lava ma talitonu, o mea lava nei e tasi, ua tausaga o taumafai atu pea i lau afioga i le Minsiita.

Ae lafo atu i aao faasoa lelei o le Kapeneta, o taitai na tofofi e faatino le finagalo o Samoa. Ae o le a foi se leo o Aleipata i Lalo...

FOFOGA FETALAI: Ia malie lau afioga i le Taitaifono, se i... e i ai se mea...

Afioga Sulamanaia Fetaiai Tauilili Tuivasa (Vaimauga 1): O lea e matau atu, o le a liliu le saunoaga a le Taitaifono o tupe, ae ava tele le sui usufono lenei i le afioga i le Taitaifono. E pau lava le mea e toe faamanatu i le Taitaifono, o lea e taua i lau tala o le tupe, le \$400,000 lea mo le tulaga i taligalu, ae pei o lea e toe avatu ai, e pei o lea e faalogologo si ou itumalo. O le taimi ua tuanai sa pasia ai le afioaga lenei o Laulii. Ia e manaia lava lou saunoa po o ai afioaga ne i te i ua...

O le lona lua o tuualalo, sa taua i lau lauga le Victim Support, e pei o le tulaga lena sa ave ai le faafesili. Ona o lea ua toe maua, o lea ua toe ave le isi tupe. Ae pei o lea na ou faafesili ona o le agaga lava o lenei Faalapotopotoga o nai alo ma fanau, o lo o i ai. Ae o lea e le i po se lilo, o lea na silasila le atunuu o faatino le mea lea o le o e fai le tufa uilipaelo. E faapena se agaga i lau afioga i le Taitaifono. O lea foi la ua toe ave i ai le isi foi tupe, ae pei o le agaga lena sa avatu, ia o sao lava latou ia e tausai ai alo ma fanau ma e o lo o i ai. Ae pei o lea ua i ai le tulaga faapena, o lea ua o faatino polokalame faapena, ua o ese ai ma le agaga sa avatu ai... aemaise o lea e naunau solo ma aisi solo i tulaga o tupe, ae o lea ua omai toe sasa mai tupe ia na toe avatu. E le gata o isi itumalo o uilipaelo a o isi itumalo o upega, ma mea faapena. E fia maua ai se malamalamaaga o lenei sui usufono lau afioga i le Fofoga Fetalai, lau afioga i le Taitaifono.

FOFOGA FETALAI: E i ai le manatu le sui usufono mamalu, atonu o se taimi saunoa i ai afioga i Minisita. O lo o saunoa le Taitaifono i lona tulaga faa-Taitaifono o le Komiti. A o tulaga o le faatinoina e i ai lava lea i le Kapeneta ma le latou faatofalaiga.

O le mea lea, e faamalulu atu i le sui usufono, atonu o lea ua faafofoga mai Minisita, mo le mataupu lea e pei ona e laga.

Tofa Hon Lauofo Fonotoe Nuafesili Pierre Lauofo (Taitai o le Itu Agai): Lau afioga i le Fofoga Fetalai, e tulai atu ma le faaaloalo...

FOFOGA FETALAI: E i ai se mea...

Tofa Hon Lauofo Fonotoe Nuafesili Pierre Lauofo: Ia e i ai si mataupu, lea i le lipoti a le Taitaifono...

FOFOGA FETALAI: Sa e laga i lau saunoaga...

Tofa Hon Lauofo Fonotoe Nuafesili Pierre Lauofo: Sa ou lauga i mataupu eseese, ae o le mea lea e pei o se faasaoga lea e mafua ai ona ou tulai, ina ia sao ia fuainumera ia e aumai i le lipoti. E lelei la lou fesili e aumai faasaoga, ae manu e le i oo i se isi... O le mafuaaga lena o lou tulai atu.

Ae faatalofa atu i lau afioga i lenei taeao fou, malo le soifua, faapea foi le maualuga o lenei Maota. Malo le maleifua mai i le pue o manu.

Lau afioga i le Taitaifono a le Komiti, se i silasila ane...

Lau Afioga i le Taitaifono o le Komiti se i silasila ane a faamolemole i le itulau... o le fesili i faasaoga ae le o Mataupu foi ie, le itulau 7 o le faaperetania. O lea ou te tilotilo atu i expenditures ia ua ou fiu e faaopoopo e le au i se piliona, sei silasila ane faamolemole. A ou tilotilo atu i le faasamoa pei e iai se fuainumera lena e pa'u mai, e pei e foliga mai la a ou tago e faaopoopo e \$700 miliona lea e pau mai i lau fuainumera lea. E tasi a le fuainumera lea na ou pikia mai le lipoti mafiafia lea a lau Afioga. Po o se faasaoga? Afai o se faasaoga ia lelei a leai, ia le afaina. O le fesili lea ma le faaaloalo.

FOFOGA FETALAI: Tulai mai lau Afioga i le Taitaifono.

Afioga FALEOMAVAEGA TITIMAEA TAFUA: Ia faafetai, saolelei o le a sei ou muamua atu pea i o i le Afioga i le Taitai o le Itu Agai. Saolelei lau Afioga o lea e sao le faasamoa ia ae misi le type iga i le faapalagi o le 7, e famalulu atu ai lea tulaga. O le mea o le mistype foi lea, e le o se alofaga ae saolelei le saunoaga, faafetai i lau Afioga le tagai i tulaga ia.

O le tulaga e pei ona fesiligia e le Sui mamalu, lena na saunoa mai le Afioga i le Fofoga Fetalai, lau Afioga ia e sao na matou faatalanoaina le tulaga lea i le \$400,000 lea o le taligalu ia sa iai si tamai feeseeseaiga ona sa masalomia e sese, e mistype. A o lea la ua mautu e saolelei lau Afioga, o le \$400,000 lea o le \$400,000 tonu a Lauilii o la ua mautinoa o le seleni a Lauilii ae le o Nofoalii. Ioe, ia faafetai. Ou te iloa o le tulaga pei ona e taua ia e le tau faailoa lea tulaga i tatou vaega foi lea o le Victim Support. E so o se, tailo i lalo o le tatou Tulafono sei o'o i le taimi e toe tali atu ai...

Tofa Mauu Siaosi Puepuemai (Vaa o Fonoti): Lau Afioga i le Fofoga o le Fono pe maua se avanoa...

FOFOGA FETALAI: Se i faamaea ona saunoa le Taitaifono.

Afioga FALEOMAVAEGA TITIMAEA TAFUA: E mafai a ona onosai se i faauma muamua le tali lea ona e tulai mai ai lea ma le agaga faaaloalo.

O le tulaga pei ona taua i le tatou Victim Support, sao lelei [.....]. Ae saolelei le saunoaga a le sui usufono o lo o maua mai e le gata i Ekalesia taitasi i Nuu i tua, o lo o faapena ona ave i ai a latou tusi aisi. A o le tulaga lea o lea e faamatuu i ai le vaegatupe e afa miliona mai le Tala o le Tupe a le tatou Malo, o lona uiga e i ai ona feteenaiga i le tulaga lea. Ae faafetai le lagalaga malo lava mo le mataala i tulaga ia lau Afioga i le Sui o Vaimauga, malo faafetai i lau Afioga.

FOFOGA FETALAI: Ia se i tulai mai le Sui o Vaa Fonoti

Tofa Mauu Siaosi Puepuemai: Ia, e muamua a ona faatalofa atu i lau Afioga i le Fofoga o le Fono tusa ai foi o lenei taeao aemaise ai foi o le faatautaiga o le Fonousu a le Atunuu. Leai, ua ou tulai atu leaga o lea ua malie a i le faalogologo ma faafogafoga foi a le Maota ae faapea foi le faafogafoga a le Atunuu. Leaga o la e faafogafoga mai si ou Itumalo i Fagalao, le Vaa o Fonoti e lumafale i le moana ae tuafale i le papa. Sa ou lauga a i lau lauga faataupou mai lava i le uluai taimi seia oo foi i le Tala o le Tupe i la foi tausaga talu ai, taligalu a, taligalu a. O lea ua maua atu e \$400,000.00 le taligalu a le Itumalo a le Afioga i le Sui Faipule o Vaimauga Nu.1, ia o lea e tatalo atu ai po o fea o taatia tonu le talosaga a le Itumalo o le Vaa o Fonoti poo le Atufagalao.

E pei e pau lena o si mea ua ou toe tulai atu ai po o le a se faamaninoga mai i lea mea ona o la e taputapu mai si ou Itumalo ma le faaaloalo.

Afioga Hon Fiame Naomi Mataafa (Palemia): Lau Afioga i le Fofoga Fetalai...

FOFOGA FETALAI: Ia se i tulai mai lau Afioga i le Tamaitai Palemia.

Afioga Hon Fiame Naomi Mataafa: E faanoi atu lava i le Nofoa faamolemole ae le i oo atu i le Mataupu a le Vaa o Fonoti i le mataupu lea faatoa mae'a atu i ai le saunoaga a le Taitaifono i le tupe faaagaaga mo le Victim Support. O lea ou te tau maua atu faapea o se faiga faavae a ave i ai le tupe a le Malo e le mafai ona toe o e suetupe. O le sao lea?

Afioga FALEOMAVAEGA TITIMAEA TAFUA: O lea lava lau Afioga.

Afioga Hon Fiamē Naomi Mataafa: Lau Afioga i le Fofoga Fetalai e i ai a sina ou popole i lea itu, ou te le mautonu po o fea mea o lo o tupu mai ai le faiga faavae. O le Faalapotopotoga lea e fesoasoani mo tatou fanau ia e i ai o latou mafatiaga po o le Victim Support o le Faalapotopotoga Tumaoti. O le Malo e ave ana fesoasoani i le tele o Faalapotopotoga ae ou te le mailoa po o fea le mea lea e i ai le faiga faavae lea. Ma ou te manatu e tataua ona faatulaga i lona tulaga tonu. E leai, o le Faalapotopotoga Tumaoti e i ai lava le latou aiataua e faaauau ai. Fai ma faataitaiga, ave tupe a le Malo i le Iuni Lakapi e le o faapea atu la le Malo i le Iuni Lakapi e sa ona tou toe o e suetupe.

Na o le pau a lena o sina vaega ou te popole pe a faapea o le a tamau i faamaumauga a le Palemene.

FOFOGA FETALAI: Ia, o le mea tonu lava lena lau Afioga i le Taitaifono sa i ai le manatu o le Nofoa e taatia pea i Minisita ia ae ona o lea ua e tali i le tulaga lea. O le ala lea ua faaali ai le finagalo o le Taitai o le Malo ina ia aveese ma tatou faamaumauga ia saunoaga ua tulai mai. Ia o lagona a faatatau ia ae le mafai ona taua ai faiga faavae a le faigamalo. Se i tulai mai lau Afioga i le Taitaifono e toe faasa’o mai lau saunoaga.

Afioga FALEOMAVAEGA TITIMAEA TAFUA: Ia malo faafetai, e pei ona saunoaina e le Afioga i le Tamaitai, le Taitai o le tatou Malo ia e saolele lava le saunoaga. O le seleni lea e ave i tatou Faalapotopotoga nei Tumaoti ia o lea e sese atu le faamatalaga. O lea e tatalo atu ai i lau Afioga e toe faafoi mai ia faamatalaga ia e i ai lona fesetaiga ona e le o se Matagaluega a le Malo, gata ai i ina le malosiaga o le Malo ma le agaga faaaloalo.

A o le seleni lea, o le tulaga lea pei ona taua e le Sui o Fagalua o le a taatia atu o se taimi ona oo lea iai, o le matafaioi tonu a lena a le Afioga i le alii Minisita o Galuega. O lo o iai le faasoasoa a lana Afioga ia atonu a le o lenei tausaga ia o le tausaga fou o le a tali atu ai. Ia po o le Afioga foi i.. aua e vaavaalua le tulaga lea ma le Afioga i le Minisita o le Siosiomaga. Ia atonu e faamalieina ai foi pe a fai se malolaga ia ona e susu atu lea e te lua talatalanoa ma le Afioga i le Minisita o Punaoa ma le agaga faaaloalo.

FOFOGA FETALAI: Ia, o lea ua faatonuina le Failautusi ina ia tuueseina ia saunoaga sa taua e le Taitaifono.

E iai se isi Mataupu le Sui o Vaimauga ua uma ona tali atu le Taitaifono.

Upu na faatonuina e le Fofoga Fetalai e aveese mai Faamaumauga o le Saunoaga a le Taitaifono o le Komiti o Tupe Maua ma Tupe

Totogi: “[*Afai o faiga faavae a aveatu le tupe a le tatou Malo i ni Faalapotopotoga nei e le toe i ai se faatagaga foi lea e toe o ai e suetupe.*]”

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai, ia e momoli le agaga faafetai ua maua foi se ai o lenei Itumalo. E pei o le agaga lena lea ou te tulai atu ai lau Afioga i le Taitaifono, ia po o lau Afioga foi Luamanuvao o le Matua o le Aiga Sa Patu e momoli le agaga faafetai ona o lenei a talosaga ia sa aveatu a i le Paeaiga ua tuanai. Ae o le Sui lea i tua o le Vaa o Fonoti ia lea faatoa oo mai ia lea faatoa... ae sa aveatu uma a ma talosaga ma si ou uso lea, ia ae talu ai pei e tau le to’a a lou uso lea ia lea la ua faamuamua ai le Vaimauga. Ia ae o le vaitaimi a i le Paeaiga ua tuanai sa aveatu ai, o lea e momoli atu ai le agaga faafetai i lau Afioga i le Taitaifono ona ua to le matupalapala o lenei Itumalo.

FOFOGA FETALAI: Ia lelei, o lea ua maua atu. Lau Afioga i le Sui o le Vaa o Fonoti ia ua iai le manatu atonu o lea ua faamau e le Afioga i le Minisita ia lau talosaga lea mo le agai i luma. Ia ae aua tatou te popole tatou faamoemoe pea i le Atua e maua ai se fesoasoani mo tatou Itumalo. Ia malo faafetai i lau Afioga i le Taitaifono lea ua manino le tatou maota e le gata foi o le vailiiliina o le lipoti a le Komiti ia aemaise foi o mataupu sa laga e Sui mamalu o le Palemene. O le mea lea malo faafetai i lau Afioga i le Taitaifono. E iai se mea lau Afioga i le Taitaifono.

Afioga FALEOMAVAEGA TITIMAEA TAFUA: Ia lau Afioga i le Fofoga Fetalai tau faamaea atu ona o lea sa i ai nai faauilavea.

FOFOGA FETALAI: Oi, ia faamaea maia lau saunoaga.

Afioga FALEOMAVAEGA TITIMAEA TAFUA: Ia malo faafetai, e pei a ona ou taua i manaoga o lenei Itumalo ia lea ua lafo atu i aao faasoasoa lelei o Taitai na tofofi e faatinoina le finagalo o Samoa. Ia o le a foi se upu e le logomalie i le faafogafoga e le gata i lou nei Sui usufono a o le matou Komiti o Tupe Maua ma Tupe Totogi. Ou te aoao atu maluipega, le afa a tautai aua e poto le tautai ae iai le aso e pisi ai le atuiama. Ia alofagia e le Atua lau Afioga i le Fofoga Fetalai ia maua lou malosi ma le tofa ma ia faatumu e le Atua le utu aua faiva ma tiute ua valaauina ai lou soifua.

Lau Afioga i le Tamaitai Palemia ia saga faafualoa e le Atua lou soifua maua lou malosi ma le lototele aua le taitaiina o le Sa Folau o Samoa. A outou Afioga i Minisita ma Minisita Lagolago ia faamanuia tele le Atua i tiute ma galuega o feagai ai. Ia faaifo mai lagi ni manuia mo lau Afioga i le Taitai o le Itu Agai ma Sui mamalu uma o le Palemene, ia tele foi ni

faamanuiaga sasaa mai e lo tatou Atua mo Pule Sili o Matagaluega ma Faauluuluga o Faalapotopotoga Tumaoti ma so o se ofisa o le Malo aua le tautuaina o le tatou Malo ma le Atunuu. E le faagaloina foi taē ia Atuā le tapuaiga le leoa a lou Itumalo e afua i Tulafono o le Talalelei le afaigaluega tofofi a le Atua i so o se fata faitaulaga o si ou Itumalo o Aleipata i le Fale i Lalo amata mai Tiavea, Samusu, Amaile, Utufaalalafa, Saleaamua, Mutiatele, Lotopue, Malaela ma Satitoa. O le paia a lea i le afio o lau Afioga i le Tuiatua na Faanofonofa afifio le paia i alalamalae, le alii o le itu ma le tane o le itu, pule na tatai i lalovi ma malaefono ma upu ia te oe Saleaamua. E le galo i le loto la outou tatalo aua e aau gata le vasa ma filifili le vaofita ae o la outou tapuaiga e mafai ai mea uma e le au iai le mafai o le auauna. Faafetai faapitoa i le Failautusi o le Fono, lau Tofa i le Tootoo Satama aea le afaigaluega i ona tulaga tofi malo le tautua tuavae.

E le faaitiitia le faamalo i le Failautusi o le matou Komiti lau Afioga Lemalu Ruta ma le vaega o le Komiti Faapalemene ma e uma na lagolago i le tapenaina o lenei lipoti ae o lo o silafia e le Atua lo outou tautua. O le tatalo a lenei Komiti ia tumau le ola tautua ma le fiafia ma tausia i ona aao alofa lo outou soifua. Faamanuia le Atua ia Samoa o lo o faafofoga tapuai mai, soifua ma ia manuia.

FOFOGA FETALAI: Malo faafetai saunoa i lau Afioga i le Taitaifono, ia ua manino le Maota aeamise foi le faafogafoga mai o le Atunuu i la outou galuega e le faigofie. Malo a galue i lau Afioga ma lo outou Komiti i lea lua vaiaso na tuanai atu, e ui lava sa faafeagai ma tatou fonotaga a le Palemene ia a o lea lava sa outou galulue i le ao ma le po. O le mea lea e momoli atu le agaga faafetai o le Maota i lau Afioga ia aeamise foi o le mamalu o lo outou Komiti ia malo galulue malo le onosai. Oa foi ni fautuaga ua aveatu e le Fofoga Fetalai ia o le naunau lava ina ia maea le tatou galuega, ia lea ua fola la outou galuega i le Maota, malo le galulue. Faafetai lava le onosai. Ia o lea o le a se'e le tatou galuega mo saunoaga talifuaitau a le Malo i Mataupu sa laga i saunoaga a Sui mamalu.

Sei tulai mai lau Afioga i le Tamaitai Palemia.

Afioga Hon Fiamē Naomi Mataafa: Lau Afioga i le Fofoga Fetalai, ia faafetai. I le faagasologa o le tatou mataupu o lo o i le Laulau-a-Fono, faamalo foi i sui mamalu o e sa saunoa i felafolafoaiga faalauaitete ia aeamise foi o le saunoaga mulimuli e taaofai i ai galuega a le Komiti sa saunoa iai le Taitaifono. Ae o le see mai o le tatou galuega i tali a le Malo, ou te faasilasila atu o le a amata mai i le itu le la, i le Minisita o le Siosiomaga ona faagasolo mai lea, e laaloa mai i le tamaitai o le Minisita o Tupe ma faaauau e oomai ia te au, ae taualuga e le Minisita e ou le Tulafono. Ia o le faaaliga lea ma le faaaloalo lau Afioga.

FOFOGA FETALAI: Ia malo faafetai o lea ua saunoa manino le Afioga i le Palemia mo le faasologa ae e iai a si faamanatu lea a le Nofoa mo a tatou Sui mamalu oloo manino lava ia tatou Tulafono Tumau, ia nao mea lava sa e saunoa iai e mafai ona lagalagā, oloo mausalī faamaumauga o tatou Fono i nisi mataupu fou e lagalaga mai o le a faailoa atu lava. Ae o le fautuaga lena ia outou Sui mamalu o a uma mea sa outou lagalaga pau ia o mea e mafai ona outou faaii lavea ai ao saunoa Afioga i Minisita.

Ia lea ua saunoa lau Afioga i le Palemia, ia lau Afioga i le Minisita o Siosiomaga ia o lou avanoa leni.

Afioga TOEOLESULUSULU CEDRIC POSE SALESA SCHUSTER (Minisita mo Punaoa Faalenatura ma le Siosiomaga): Ia faafetai i lau Afioga i le Fofoga Fetalai mo le avanoa, viia le Atua e faavavau ona o lana pule agalelei leni ua gafoa i le Maota Fono o Samoa i lona alofi aao laveai, ua mafua ai ona maliefua i lagima lau Afioga i le Fofoga Fetalai o le Matoa, ae taumua lelei le vaatiu lau Afioga i le Tamaitai Palemia o Samoa lau Afioga i le Sa’o Faapito. Ua nofoia le fala le gae’e o Minisita o le Kapeneta ma Sui Minisita, alalatai lau Afioga i le Taitai o le Itu Agai lau fetalai i le Alomua o le Tuiatua ma nofo a tulatoa o tootooia o Sui o le Palemene o Samoa. Ua ta manatu foi i le tala i le faamutu na i le fale o le Tuamasaga e Sa le Imoa Sa le Poua’e ae ua le ‘alo’alo tuagalua se taofi e faigata lau tapuaiga mamala Samoa. O lea ou te muai taia le pola taufafo o le fale nai Amoa e ato fuli i le tinomasalalala ae atuvao i laau taia o le vaosa aua le tapuaiga maualuga i lau Afioga mamalu o le Ao o le Malo ae soo le fau i le Manūtoao a lau Afioga i le Sui a Fono a Sui Tofia, afio le Faamasino Sili ma le Peresetene o le Faamasinoga, le afifio o Tama ma Aiga, Aiga ma latou Tama, le fala le see o Pule ma Tumua Ituau ma Alataua Aiga i le Tai ma le Vaa o Fonoti. E le seu ama i le la itu o le vasa auā e uso i tamalii uso i faleupolu, le paia tele o le Faleagafulu ma Manuatele tainane le tafatolu o le Faigamalo o Tutuila ma Manu’a.

Lau Afioga i le Fofoga Fetalai e le galo Afi’a i le vao i le tapuaiga mamana o Taitai o Ekalesia oloo alagaina le galu ma siitia le atu o le taeao auā agaga o Samoa mo le Atua, malo le faitatalo o leni ua tafi toelau le atupue a Samoa ae fiti pea malama aua le aloalo failele o le Palemene o Samoa. E faafotu ua leai ni manū aua le atunuu lautele, le tatou Itumalo i ona ou paia faalagia e leai se tagata e faalemata’u e soona male pe fia lagona i ou sa ma ou faiga auā e tumau lava o nei o taeao e oo lava i le iuga. Mapu maia i lagitapu ma outou pōpō i falemanū ae sei puai se tatou sao aua fausaga o le vaatele i le tau lafoga o fai nei.

Lau Afioga i le Fofoga Fetalai, o le faatauagai o finagalo sa liaina i le tofa ma le faautaga o leni o le a sei taumafai e tali atu iai. Faafetai atu e silia i le 30 Sui o le Maota sa afea i latou saunoaga vaega eseese o auaunaga a le Matagaluega o Punaoa Faalenatura ma le Siosiomaga faapea le Pulega o

Tagata Tafafao mai Fafu e ala lea i; Taligalu, Malosi Faafouina, Eleele, Lologa ma Faalavelave Faafuasei, Le aoina o le lapisi ma otaota, Faasaoina ma le toe Totoina o le Vaomatua, Ma le Siosiomaga faapea ma Tagata mai Fafu.

Lau Afioga i le Fofoga Fetalai, o le a muamua atu se vaivaiga i nisi o Sui sa latou lagaina le Malosi Faafouina. talitonu o le faafesili e tusa o le 30% pe aisea ua paʻu ai lalo. O le tali faigofie lau Afioga i le Fofoga Fetalai ona ua siitia le manaoga o le tatou eletise. Ae oloo iai le fuafuaga a le tatou Malo ina ia ausia le 70% e pei ona fuafuaina lalo o le tatou Pathway of Development for Samoa (PDS) i totonu o le isi 6 tausaga o le 2031. O fuafuaga lau Afioga i le Fofoga Fetalai i tausaga ua tuanai lea e faapea sa ausia le 100% i le 2025 i le toai mai o le Faigamalo ma toe feutagai ma le Matagaluega ma tapenaga o lea na toe silasila iai, ia ua fai si maualuga tele o lea, e lei mafai ona ausia e pei ona iai i tausaga ua tuanai i le 2017 sa iai se fuafuaga a le Malo foi i lea vaitau e maua ai le 100% lea la ua toe faatulaga ai i le 70% i le 2031 e tusa o le tatou PDS (Pathway of Developments for Samoa) ae leo taofia ai galuega fatino oloo galulue ai le Matagaluega o Malosiaga Faaeletise ma le tatou Pulega foi o malosiaga faafouina. E faailoa foi nisi o vaega sa faapea ona saunoa iai le Sui i isi technology o le OCheck, Geo-thermal, ua maea ona fai iai iloiloga e le gata i le taugata o nei atinae ae tele foi le vaega e aafia ai ona e lei lava tele le technology. Ma le vaega lona lua lau afioga, e le'o tele se manaomia e tatou investment e le'o se eletise o manaomia i totonu o le tatou atunuu, ae peitai lau afioga o se tasi o vaega faatauuina i le fuafuaga oloo iai nei o le faataoto lea o le 10% -20% o le malosiaga faafouina e mafai ona faaoga iai tatou communities o aiga taitasi e connect ai i le greed e aoga ai la le faaoga ai ia o Solar e lei mafai ona faatinoina lea vaega o le Tulafono foi i tausaga ua mavae.

Lau Afioga i le Fofoga Fetalai, ona ou see mai laia i nisi o Sui sa faapea ona lagaina ma faafesiligia ia...

Afioga Fuaava Suluimalo Amataga (Aleipata Itupa i Luga): Lau Afioga i le Fofoga Fetalai pe maua se avanoa faamolemole.

FOFOGA FETALAI: Ia malie lau Afioga i le Minisita sei tuu atu le avanoa i le Sui o, o se mataupu sa laga e lau afioga i le sui mamalu.

Afioga Fuaava Suluimalo Amataga: Ia faafetai, ia o lea lava lau Afioga i le Fofoga Fetalai. Ia faafetai i le Afioga i le Minisita o lea ua tali manino mai i nisi o vaega sa taua. Ae o le tulaga lea e faapea ua siitia le eletise ua pau ai i lalo le tatou pasene i le 32% ia ae e iai lou talitonuga aua o le isi foi lea matafaoi lea a le tatou vaega lea o le efficiency foi lele, tusa lava pe tele le demand ae ia efficient e faasau ai i lalo le load o consumption o tatou mea ia e faaoga i le eletise, atonu o mea na pe vaavaalua.

O le isi foi tulaga sa taua, ou te iloa o le Paeaiga talu ai sa iai le fuafuaga foi lele sa ou laga foi i le isi Tala o le Tausaga Faaletupe i le Development lea o tatou Solar i tuā i Aleipata e vaavaalua ma tatou afi savili la e iai o tatou wind poo le a se tulaga o iai ona e tau matau atu e lenei usugafono atonu o le tulaga lea e pei ua pau maualalo ai le tatou pasene lea ua e saunoa o lea ua toe fesui ai i le 70% i le 2031, e 70% le target lea ua iai ae e pei o nai mea ia. Ae faafetai o lea ua iai le 141,000 lea mo developments a le tatou Faigamalo pe le'o maua ai se isi mea e toe faaopopo atu ai nisi tatou plant foi ia e tau tulei atu ai pea i luga ia le tulaga o le tatou Malosi Faafouina e pei o nai tulaga foi ia e fesoasoani atu ai, ma le agaga faaaloalo, faafetai.

FOFOGA FETALAI: Ia malo faafetai, e iai le manatu lau Afioga i le Minisita sei foi mai le tatou malologa ona e tali lea i le faafesili a le Sui mamalu ae ua tatou taunuu mai i le tatou taimi malologa masani o le taeao.

Ia o le a faataatiaese galuega o le Fono Aoao Faitulafono mo lana malologa masani o le taeao.

Na faataatiaese Taulumaga a le Fono Aoao mo lana malologa masani i le itula e 10:46 i le taeao ma toe faaauau i le itula e 11:23 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Ua saoialo le taumafataga o le taeao pei ona sa alo atu i ai le paia o le tatou Palemene, e i ai foi le manatu ua maua se faasiligamalosi e faaauau ai le tatou galuega. Faamalo le onosai i le tatou Maota.

E faataatiaese Taulumaga mo le malologa o lo o saunoa le Afioga i le Minisita o Punaoa Faalenatura ma le Siosiomaga e talifuaitau foi i mataupu sa laga e nisi o sui usufono mamalu. O le mea lea ou te tapa lau Afioga i le Minisita mo le faaauauina o lau saunoaga.

Afioga Hon TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. E toe faaopopo foi le faafetai i lau Afioga ma le Matagaluega e tusa ai foi o le faasiligamalosi ua maua e sui usufono o le Palememe aemaise Ofisa Sili o Pulega o Matagaluega o lo o faapea ona tatou mafuta i lenei aso.

Lau Afioga i le Fofoga Fetalai, ia se i taumafai e tali muamua atu le faafesili a le sui usufono mo Aleipata Itupa i Luga i le vaega ua ala ai ona pau i lalo le tatou renewable energy. E pei lava ona avatu muamua, o lea e retain lava le tatou solar ma le tatou renewable energy ia ua leva ona faatulaga mai e pei o le solar, o le tatou hydro ma le wind mill lea i Aleipata. Peitai lau Afioga i le taimi na faatu ai lenei vaega, pe a ma le 29 i le 30 mekauati,

demand sa i ai i totonu o Samoa. I le taimi nei, ua siitia i luga atu po o le 37 mekauati le demand, pe a ma le 32 le big requirement o Upolu, ae pe a ma le 5 mekauati le requirement o Savaii. O le ala tonu lea lau Afioga ua ala ai ona tumau le tatou vaega lea i lalo, ua tau sau agai lalo, ona e le i ai ni tatou renewable energy fou ua faatulagaina.

Lau Afioga ona sosoo atu ai lea, o lo o i ai fuafuaga a le tatou Malo i se tasi foi o vaega sa faapea ona silasila i ai le Malo ma faataua, o le tatou conversion lenei, e ao ona aua ne i toe tuuina i se vaega e monopolize ai e se kamupani se tasi, ma ua faatalanoa, ua i ai foi nisi o kamupani Samoa ua faaali mai lo latou naunautaiga e mafai ona latou faatinoina le vaega lea o le waste energy e faaaogaina ai lapisi ma convert ai e maua ai le eletise. E i ai foi nisi vaega ua latou faatulaga mai vaega ia ina ia mafai ona fai ai le tatou wind mill, le tatou wind energy ma le tatou solar. O le faanaunautaiga lau Afioga i le Fofoga Fetalai, a mafai loa ona faatinoina uma nei vaega, o le a tele kamupani eseese e latou produce ina le renewable energy ma siitia ai loa i luga atu o le tatou threshold lea po o le faanaunautaiga lea e i ai o le 70%.

Lau Afioga i le Fofoga Fetalai ona ou see mai lea i le tulaga lea...

Afioga Lupematasila Galumalemana Tologata Togia Tile Lei'a (Falelatai ma Samatau): Lau Afioga i le Fofoga Fetalai...

FOFOGA FETALAI: Malie lau Afioga i le Minisita se i tuu atu le avanoa i le sui usufono o Falelatai ma Samatau. O se mataupu sa laga e lau Afioga i le sui usufono mamalu?

Afioga Lupematasila Galumalemana Tologata Togia Tile Lei'a: Ia lau Afioga. E leai se agaga e fia faalavelave i le saunoaga matagofie a le Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, e le i saunoa le sui usufono lea i le mataupu lea.

Afioga Lupematasila Galumalemana Tologata Togia Tile Lei'a: Lau Afioga i le Fofoga Fetalai o lea sa ou lauga i le tulaga o le tamaoaiga ma le taugata o le soifuaga. E aafia uma lava mea ia i le tau o le soifuaga ma le tamaoaiga.

FOFOGA FETALAI: Ia malie leaga o lea ua e sailia i mataupu taitasi, a o le agaga lena o lea ua matau atu o lea ua saunoa manino le Minisita o lo o i ai faamaumauga, e faapena foi le faamaumauga a le tatou Ofisa o le Fono. O le mea lea, e faamalulu atu i lau Afioga i le sui usufono mamalu, ia...

Afioga Lupematasila Galumalemana Tologata Togia Tile Lei'a: Sa i ai lava le manatu o lea tatou te talanoa i le tulaga aoaotetele o le Paketi, o lea tatou te le i oo atu i mea taitasi. Ae pei lava ona ou tau faapulapula atu, e aafia uma lava mea ia i le tau o le soifuaga tamaoaiga o le atunuu.

FOFOGA FETALAI: Ia lau Afioga i le Minisita se i tulai mai.

Afioga Hon TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai.

Ona see mai lea lau Afioga i le Fofoga Fetalai i le vaega o eleele. Faafetai atu foi i le tele o nisi o sui usufono o le tatou Palemene sa laga. Ia o le a taumafai atu se vaivaiga e tusa ai foi o le faatulagaina o lo o i ai o tatou eleele i le taimi nei.

Afioga Lupematasila Galumalemana Tologata Togia Tile Lei'a: Lau Afioga i le Fofoga Fetalai...

FOFOGA FETALAI: Ia malie lava lau Afioga i le Minisita, e i ai se isi mea o...

Afioga Lupematasila Galumalemana Tologata Togia Tile Lei'a: Leai o lea e faatalitali atu po o le a se faaiuga a lau Afioga i le Fofoga Fetalai i le talosaga foi a lenei sui usufono mamalu ae saunoa...

FOFOGA FETALAI: O le a tonu lava le mataupu lea e te fia saunoa ai?

Afioga Lupematasila Galumalemana Tologata Togia Tile Lei'a: O lea ou te fia agai i o i le mataupu o le malosiaga faafouina.

FOFOGA FETALAI: Sa e lauga i le mataupu faafouina?

Afioga Lupematasila Galumalemana Tologata Togia Tile Lei'a: A lea pei ona ou faapulapula atu e aafia uma lava le tamaoaiga.

FOFOGA FETALAI: Ia, se i tulai mai lau Afioga i le Minisita o Faatoaga.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Ioe, e tumu lava i le ava ma le faaaloalo, e matau foi o lea lava e faasolo le tatou taimi. Malie ia le sui usufono, o le tatou Tulafono Tumau, faatoa tali lava le Minisita i le mea na e laga i mea na e saunoa i ai i lau lauga. Ua uma ona faataatia le alafua o Tulafono Tumau, ae malie ia o lea ua faasolo le Tali a le Malo.

FOFOGA FETALAI: Ia, e talitonu lau Afioga i le sui usufono mamalu, ia leaga o... Se i tulai mai lau Afioga i le Minisita mo Pisinisi, Alamanuia ma Leipa.

Tofa Hon Leatinuu Wayne Soialo (Minisita mo Pisinisi, Alamanuia ma Leipa): Lau Afioga i le Fofoga Fetalai, o lea e ia te au tali o le fesili a le Afioga i le sui usufono. Ae se i oo i lou taimi ona ou tali atu lea.

FOFOGA FETALAI: Ia, o lea ua sauni mai le Minisita o Pisinisi ma Alamanuia e tali atu i lau faafesili.

Afioga Lupematasila Galumalemana Tologata Togia Tile Lei'a: Faafetai atu i lau Afioga i le Fofoga Fetalai, o lea ua ou talia le faaiuga a lau Afioga.

FOFOGA FETALAI: Ia faafetai. Ia faaauau le saunoaga a lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai. O lea e faamauina o lea e uma ona oo atu lea i ai i malae taalo lea na saunoa i ai le sui usufono. O lea la e tapena atu foi i ai lau Afioga.

Lau Afioga i le Fofoga Fetalai ona ou see mai lea i le vaega lea o tatou eleele. E matauina pea atonu o se aoga foi lenei avanoa e toe faapulapula ai i le tatou Maota lau Afioga le faataatiaga o lo o i ai le resitalaina ma le lisiina o tatou eleele i le taimi nei.

O freehold land e lavea ai ma fanua ia a le Malo, na pau lea o fanua o lea e faaoga ai le tatou Tulafono foi lea o le LTRA08, a o fanua faaleaganuu, o lo o faaogaina pea le Tulafono lea na fai i le 1965, o le Lisiina o Fanua Faaleaganuu. E le o resitalaina foi la ni fanua e lisi i totonu o fanua faaleaganuu i lalo o le LTRA. O le masani o lo o faatino pea i le tatou Tulafono lea o le Leasing and Licensing of Customary Land i le 1965 na suia le igoa i le 2019 ma o lo o faaauauina, lea o lo o faaoga lea Tulafono e lisi ai eleele foi nei o tatou afioaga ma aiga e faaogaina, e le gata o faletalimalo, ae o le tele lava o pou ia a le Digicel, ia o afu, o tatou auala. O vaega ia o lo o lisi ai. E leai la se feteenaiga o eleele lava pei ona i ai i le tatou Faavae, e le mafai ona faatau eleele faaleaganuu. A lisi foi la, e lisi lava i lalo o le Tulafono lea o le Leasing and Licensing of Customary Land. O le masani lava lea o lea e i ai, atonu sa i ai i le tausaga ua tuanai i lalo o le LTRA, a o lea ua toe tuu mai lava le lisiina lea o tatou fanua faaleaganuu i lalo o le Tulafono tuai.

O le tulaga lea e pei ona faafesili foi nisi o sui usufono i eleele ia a le SLC, lea na toe faamatuu ae faapea e customary. Ia lau Afioga i le Fofoga Fetalai,

o lo o taoto nei i ai se faatalatalanoaga a le Matagaluega o le Siosiomaga ma le Ofisa o le Loia Sili ina ia fai se taotoga lelei o lea polokalame, ona e i ai le feteenaiga lea i le toe faafoi o eleele, ae toe intend e le customary land, a customary land loa, ua le mafai ona toe faatau. Ae o le taotoga lea o lo o taoto mai lo outou faatuatuaga le tatou Palemene nei, o lo o faatino le galuega a le Matagaluega o le Siosiomaga ma le Loia Sili ina ia i ai se faataotoga lelei mo ia vaega o eleele.

Tofa Ale Vena Ale (Faleata 4): Lau Afioga i le Fofoga Fetalai...

FOFOGA FETALAI: Ia malie lava lau Afioga i le Minisita, se i tulai mai le sui usufono mo Faleata 4.

Tofa Ale Vena Ale: Faafetai i lau Afioga i le Fofoga Fetalai mo le avanoa. Ua ou tulai atu ona o le mataupu tonu lava lea sa ou fesiligia ai le Afioga i le Minisita o le MNRE. Faafetai lava i lau Afioga i le Minisita ona e pei ona ou taua foi i le taeao ua sola ma ou augani atu i lau Afioga faapea foi le Minisita o le SLC ona ua toatele lou itumalo, aemaise lava lou nuu lea o Toamua ua faatau fanua, ua uma ona... ae o lea e aumai le SLC o fanua faaleaganuu, ae omai i i i lau Afioga ma le Matagaluega i le mea o lo o resitala ai fanua, e le o se fanua faaleaganuu o le fanua freehold. Ae ou te faafetai atu i lenei taeao o lea ua momoli mai lou finagalo, o lea ua taoto atu i le... ia ua tataua ona... a faapea e toe faafoi atu o fanua faaleaganuu, ia e leai se mea o le a toe totogi ai lena \$35,000. Manuia tele le fonotaga lau Afioga. Faafetai lava.

FOFOGA FETALAI: Ia, lau Afioga i le Minisita, faaaau le saunoaga.

Afioga Hon TOEOLESULUSULU CEDRIC POSE SALESA SCHUSTER: Faafetai, faafetai mo le faamamaavega. E pei lava ona avatu foi se vaivaiga o le galuega lea o lo o faapea ona faatino i le taimi nei. Atonu e too atu i le isi tatou Tala o le Tupe ua maua se taotoga lelei o lenei faamoemoe.

Lau Afioga i le Fofoga Fetalai na i ai foi nisi o sui usufono sa afea le vaega ia o quarries, ma o lo o tapena i ai, o lo o i ai lava i lalo o le tatou Vaega lea o le PUMA so o se isi e fai le development consent. E asia foi e le Matagaluega o le Siosiomaga ia mautinoa e i ai ni aafiaga o nei vaega. Ma o lo o i ai foi conditions a uma ona faaaogaina le quarry, e i ai galuega e ao ona toe fai ina ia toe faafoi ai le siosiomaga o lenei vaega i se vaega lelei.

Ia, o le sui usufono o Falelatai ma Samatau lea sa saunoa i le tulaga lea o le togatogo ma o lo o fia fai i ai se malae taalo. E faigofie lava, afai ua taoto mai se talosaga a le tatou afioaga po o le tatou itumalo foi, o le a faapea ona

iloiloina e le tatou Komiti o Eleele ma i ai foi ni fautuaga po o ni auala e mafai ona faatino ai lea faamoemoe.

Ona ou see mai lea lau Afioga i le Fofoga Fetalai i le vaega lea o taligalu. Ou te talitonu o i lea sa toatele sui usufono o le tatou Maota sa faapea ona sausaunoa i ai. O le faamaioioina o galuega fai a le Matagaluega o Punaoa Faalenatura ma le Siosiomaga ma le Vaega a le LTA, o aseta a le Malo e ala i auala, o vaega ia o taligalu ia e faatino as part o le asset management ma le puipuia o aseta a le Malo, o vaega la ia e i lalo o le Pulega a le LTA. Afai la o le auala o lea e faafou atu a manaomia se taligalu, o le vaega lea o le poloketi e faatino e le LTA. A o le tele o isi o tatou afioaga ma vaega e le o ni aseta a le Malo a o aseta a afioaga ma alaafaga po o aiga foi, ia o le vaega la lea e taoto mai le tatou vaega lenei o Punaoa Faalenatura ma le Siosiomaga.

Lau Afioga i le Fofoga Fetalai, i le oo mai o le tatou faigamalo, ma e i le tausaga muamua lava leana amata ona faailo ai foi finagalo o sui usufono taitoatasi i le manaomia o ni taligalu. Sa ou tali manino i lea vaitau, e leai se tupe a le tatou Malo o i ai o faaagaaga mo ia vaega. Atonu foi la i nisi o sui usufono faapea o lea na io atu le Malo talu ai o le a fai latou taligalu, lau Afioga, ai na io i ai a o la e iloa e leai se tupe e fai ai.

I le oo mai o le tatou faigamalo ma ua silasila foi le Afioga i le Tamaitai Palemia ma le Kapeneta i le taua o lenei aseta, o lea na galulue ai loa ina ia taumafai e vaavaai ni seleni a tatou paaga e ala foi i tatou manaoga i impartial climate change. E le gata i lea sa faagasolo loa le galuega a le Matagaluega faapea ma le LTA e toe asia afioaga ma alaafaga ma vaega taitasi uma e ono manaomia taligalu. O lea la lau Afioga ua faamaea le tele o le latou tapenaga. Muamua sa saili i tatou sim plans po o coastal infrastructure management plans lea na faia e itumalo taitasi i le 2007 ma le 2015. O i na faataoto mai ai itumalo ma afioaga e manaomia ia taligalu. Apeitai ane o le leai o se seleni na le mafai ai ona faatino ia vaega. O le toe asia la e le tatou Matagaluega ma le Pulega a le LTA, o lea ua toe faataoto mai ai, ia tatou priority areas. O le faamoemoega lau afioga, atonu o se vaitau o le tausaga nei, le financial year lenei, o le a amata ona maua ai se fesoasoani tau tupe e amata loa ona faatino ai le tatou priority areas lea ua uma ona faatino.

Ae faamalie atu i le sui usufono o Vaimauga 1, e le o faataoto le \$400,000 lea mo le afioaga o Lailii. O lo o i ai a tatou...ona e le o iloa pe lava i le \$400,000, ae ona o lea ua i ai priority areas e silasila i ai, ina ia mafai ona faatino uma. O le faamoemoega a maua loa ma isi a tatou seleni lea ua fuafua, o le faatino ai le tele o tatou vaega nei, o lo o fuafuaina. Ae ua uma ona,...e pei ona avatu se vaivaiga, ua faatulaga e le tatou Matagaluega ia vaega. O le mea mautinoa lava o le afioaga o Lailii, o le tasi lea vaega aupitosili ona aafia o le tatou atunuu, aisea? E leai se ava, e alu atu sao lava le galu, o lea foi na ala ai ona faatino ia taligalu i tausaga ua mavae. Ae

afaina ia ua i ai, o lea ua ala ai ona toe silasila i ai. E i ai foi nisi o afioaga ua leva ona faatulai atu nisi o a latou talosaga, o lea la e fuafua, e tau faasoasoai i ai le seleni lea. A o le faamoemoega, a mautu mai loa nisi a tatou fesoasoani lea e i ai, ona faataunuu lea o isi a tatou taligalu, e faapea ai foi ma le taligalu o lo o faapea ona faafesili i ai le sui usufono o Vaa o Fonoti, ma le afioga i le sui usufono o Aana Alofi 1, ma nisi lava o sui usufono o le tatou Palemene.

FOFOGA FETALAI: Ia malie lau afioga i le Minisita se i tuu atu le avanoa i le sui usufono mo Aana Alofi 2.

Afioga Aiono Tile Gafa (Aana Alofi 2): Lau afioga e leai se...o Aana Alofi 2, ne i te i ua o atu fai ia Faleasiu a e o la matou te vaavaai mai. Ae o le agaga faafetai o lea ua manino le faalogo atu. O lea e i ai le isi vaega o lea e faatali, atonu o le a oo i ai le faasoai. Ae ou te iloa o matou na e i ai i le 4 lena. Faafetai tele.

FOFOGA FETALAI: Se i tulai mai le sui usufono mo Vaimauga 1.

Afioga Sulamanaia Fetaiai Tauiiili Tuivasa: Lau afioga i le Fofoga Fetalai, ioe e momoli lava le agaga faafetai i le afioga i le Minisita, ana nei i le taimi na saunoa ai le Taitaifono a le Komiti o Tupe, ua matua tumu le telefoni i le faafetai mai a le itumalo. Ua vili mai ma text mai ma faafetai ua maua lo tatou ai. Ae ou te le iloa pe toe lua ni sekone sau se isi tala faanoanoa i le saunoaga a le Afioga i le Minisita o Siosiomaga. E pei o le agaga lena lau afioga, aua ia ne i tatou toe tepa i tua e pei o le lauga a lena itumalo. Ona o le faatuatuaga sa ave e lo tatou Palemene i le Komiti o tupe, e pei o lea ua saunoa manino lava le Taitaifono o le Komiti o tupe ma aumai. O lea ua pei ua toe feteenai i i, ia finagalo o le Taitaifono o le Komiti o tupe ma le Minisita.

E manatua foi o le Taitaifono o le Komiti o tupe, e pei e aamia ia Matagaluga ma aumai o latou lea ua i ai le...e pei e tau faapena se lagona, ae faafetai lava, o lena ua e silafia ua matua mafatia le afioaga lena. Ae o le tatalo, e sao lelei lava lau saunoaga e le lava i le \$400,000. Ae tulou le Maota, e leai o matou gauta o maa tetele e pei e faigofie, e pau lava le mea o le konekarate, ae sapalai mai e o matou lava eleele ia maa, ina ia fai ai. O le popolega lava, ne i te i ua sau se mala faalenatura. Ae lafo atu i lau afioga o lea ua faalogologo le itumalo, ua talia le talosaga a lena itumalo. E mai lava i le Paeaiga ua tuanai, e oo mai, o lea ua outou tali ua i ai lo outou ai, i le tulaga o le faigamalo lea ua tulai mai. Ia manuia le fonu i lau afioga i le Fofoga Fetalai, ma le afioga i le Minisita.

FOFOGA FETALAI: Ia tulai mai lau afioga i le Minisita...O le sui usufono mo Safata 1, e i ai se mea na laga.

Afioga Leana Ronnie Posini (Safata 1): Faafetai tele i lau afioga i le Fofoga Fetalai, e tasi lea mea na laga e le matou tala a lo matou foi itumalo, ona o mea nei o taligalu. E masalo na amata mai i le Paeaiga lea talu ai. Ae o fononua lava i le amataga foi o le Paeaiga lenei, e le misi lava lau lauga i taligalu. E ala ona ou lauga ai, ona o la e faafogafoga mai nuu o lo matou itumalo. E le tasi la, le lua le tolu au lauga lau afioga i le Minisita, ae o lea e tau matau atu, o la e faapito i lalo le lisi ia nuu o lenei afioga. E pei o le ala lea, aua e le te i lagalaga, ona e sili ona taua o la e faalogologo mai ia nuu o le itumalo. Ma le agaga faaaloalo.

FOFOGA FETALAI: O lea ua maua atu. O le sui usufono o Satupaitea se i tulai mai....

Afioga Hon Lautafi Fio Selafi Purcell (Satupaitea): Ia faafetai i lau afioga i le Fofoga Fetalai leaga sa ou lauga foi i le mataupu lea. O lea la e lagona ai le faanoanoa i le faalogologo atu, o le \$400,000 foi lea, faapea e maua ai so matou avanoa. A o lea ua saunoa mai le Taitaifono, e leai o la ua alu i....e lelei pe afai ua alu i si ou uso i Vaimauga. Ae tatau ona faamanino mai totonu o le Tala o le tupe, ona leai lea o se mea e lauga i ai. Ae o lea ou te talitonu i le Minisita, ia o le a i ai nisi vaegatupe, e maua mai, aua lava mea nei.

O le mea foi lea faapea a leaga auala o le Malo ua fai e le Matagaluega o Galuega Tetele ae a leaga ia aiga, ua fai e Matagaluega o le Siosiomaga. A siisii loa le tai i le mea lea ua i ai i le suiga o le tala o le tau, e sau lava le galu, e le faapea sau faapea, faatali aua le oo i luga o le auala....e sau lava i fale o aiga, alu i luga o aualatele. E toalua la tagata e tatau ona silasila i ai. Ae e i ai lou talitonuga e i ai ni alagatupe, Faalapotopotoga nei a le lalolagi lenei tatou te i ai. O lea e saotupe i ai atunuu maumea, aua le aafiaga o le tau, o nuu nei e pei o tatou.

FOFOGA FETALAI: O lea ua maua atu le finagalo o le sui usufono mamalu...

Afioga Hon Lautafi Fio Selafi Purcell: Lau afioga i le Minisita, se i tilotilo ane, aua ou te fai atu foi au. E tatau lava ona numera lua pe numera tasi le matou nuu, leaga ua ou vaai i le faaletonu. Ae taatia atu, faafetai.

FOFOGA FETALAI: Ia le sui usufono mo Faasaleleaga 2.

Afioga Magele Sekati Fiaui (Faasaleleaga 2): Faafetai ua maua se avanoa, leaga o lea foi sa taua foi le taligalu i lau lauga ananafi. E faafetai lava i le Minisita o lea ua faamanino faiga faavae mo taligalu. O taligalu foi e fai e le LTA ma le taligalu e fai e le MNRE, o lea la ua faalogologo ma le totoa, ia faafetai o lea ua manino. O le taligalu lea sa ou talosagaina, mo le alia foi lele, e tuaoi ai...e masalo o se vaega o le \$400,000 lea o le a faaoga i le taligalu lea, aua o lea ua manino i lana saunoaga ia le eseesega o vaega ia. O le mea lea e momoli atu ai le faafetai i le Minisita.

FOFOGA FETALAI: Ia malo, ou te iloa o lo outou finagalo uma lava lea. A o lea ua saunoa faalauaitetele le afioga i le Minisita, ia o lo o saili lava ni tatou seleni aua tatou galuega... Ia se i tulai mai lau afioga i le Minisita o Galuega Tetele.

Tofa Hon Olo Fiti Afoa Vaai: E faafetai atu i lau afioga i le Fofoga Fetalai, ua ou tulai atu e faaleo lau talosaga na faaoo mai ia te au, i taligalu foi o le Fofoga Fetalai. O le tulaga lea na saunoa i ai ia le sui usufono o Satupaitea. E saolele lava le saunoaga, i le mea lava lea ua alu faasoloatoa po o ai tonu e faia taligalu a e o ai e faia...e pei o le mea lea e i ai...ia ma talivai. E pei o le mea lea, e faaluafesasi ai foi le ma galuega ma le afioga i le Minisita o le Siosiomaga. Ona o le tulaga sa faataoto mai e le tatou faigamalo talu ai. Ae faafetai i le sui usufono mo Satupaitea o lea ua toe laga, o se mea foi e tataua ona toe tagai i ai lo tatou faigamalo. Ia ave lava mea e mafai ona faatino e lea Matagaluega ma lea Matagaluega. Ae le o se tulaga fou na fai nei, o le mea lava ua leva.

Ae sao ai le saunoaga a lau afioga i le isi tatou fonotaga, se i matou taumafai atu e faalelei mea sa tau faaletonu. Ma le faaaloalo, ae o lea ua uma ona faaleo lau talosaga.

FOFOGA FETALAI: O lea ua uma foi ona ave le talosaga i o i le Minisita o Siosiomaga. Ia tulai mai, e i ai se isi mea lau afioga....

Afioga Hon Lautafi Fio Selafi Purcell: Ou te faafetai atu i le afioga i le Minisita. O le mea tonu lava lea o lea e faapea ua faaluafesasi, ona o lea ou te tautala lava au, i le mea la e tupu i le matou nuu. E muamua aafia mai aiga i lalo la i i, lavea ai loa ma le auala...o lea na avatu ai lau tusi talosaga ia oulua uma. E po o ai lava, ia galulue ane fai la ta taligalu ma le auala. Faafetai.

FOFOGA FETALAI: Ia tulai mai le sui usufono mo Gagaifomauga 1.

Tofa Hon Faimalotoa Kika Stowers-Ah Kau (Gagaifomauga 1): E faafetai i lau afioga mo le avanoa. E tulai atu foi, e faafetai tele...e faatoa pe

ua taumaioio mai le mataupu lea nei. E pei o le tulaga e pei ona saunoa i ai le sui usufono mo Satupaitea, o se mea lea, na ou sau lava au, o tuitui mo lo ta itumalo ua leva tele. Ae e sao ai, ona o le tulaga tonu lea, e muamua aafia ia....aua e ogatotonu le auala. Po o fea e ave i ai le faamuamua po o aseta a le Malo po o le soifua o le tagata. O le mea lea ua ou fiafia, o lea ua tau faapulapula mai, ina ia manino mai, po o i, po o i, ta te tuitui i ai i le isi taimi o lata mai. Ae faamoemoe i le saunoaga a le Minisita o lea o le a tau saili mai ni seleni, ona ua toatele tele e ua talosaga mai i lea itu. Ma le faaaloalo.

FOFOGA FETALAI: Lau afioga i le Minisita faaauau mai....

Afioga Hon TOEOLESULUSULU CEDRIC POSE SALESA SCHUSTER: O lea e faamaumau uma lava i i, sui usufono na saunoa. E pei foi ona avatu se vaivaiga i le amataga, e silia ma le tolusefulu sui usufono o le Maota sa laga, ae le i lavea ai la le sui usufono o Gagaifomauga 2....o i 1, e faamalie atu lava i le tulaga lea o taligalu. E pei ona avatu seo lea ua faataoto le polokalame a Matagaluega e lua, e sailia ai ma asia vaega, e le gata o le Palemene nei, a o Palemene ua maea. Ona faatino ai lea o le tatou faamoemoe lau afioga i le Fofoga Fetalai.

Lau afioga i le Fofoga Fetalai, ona ou see mai lea i le vaega lea na afea i saunoaga a nisi o sui usufono, i le toga laau. O le faamoemoe o le polokalame lea na amatalia ai ma ou faauauina, ma le faamoemo o le tatou faigamalo. Ia mafai ona toe faataua i afioaga ma alalafaga le tulaga lea o le toe totoina o le vaomatua. E le gata o le vaomatua, a o le matafaga foi. O lea sa sau i nisi....O le polokalame la o lo o faatino nei, e tolu miliona laau o lo o toto. O le faamoemoega e tolu uma avanoa i itumalo uma. Sa fai le sefulu itumalo i le tausaga muamua, o le tausaga lua e sefululima, o le tausaga lona tolu e faamoemoe e luasefulu. Ia uma ifo le ono tausaga ua aofia uma itumalo e limasefulu tasi o le tatou atunuu. E le taotasi foi e faapea o le vaomatua, po o vaega o lo o i ai tatou apovai po o watershed. O i ai nisi o afioaga e pei ona maua, i saunoaga a se tasi o sui usufono, e leai o vaega uma ia e mafai ona faatino e galulue ai le Matagaluega ma afioaga. O nisi foi o afioaga po o itumalo, e tau leai se lau uta, ae o le tele lava o matafaga. E ao ona galulue, po o a laau, e tatau e le gata i toga togo, po o a laau e taua ma lelei, e fetai mo le taofiofia o le tafi ese atu o matafaga.

O le faamoemoega lea e i ai e pei ona avatu ai se vaivaiga muamua, e faasopolia uma itumalo o le tatou atunuu. Lau afioga atonu foi e aoga leni vaega o le tatou mafutaga, e avatu ai se tuualalo i nisi o itumalo, ua maea ona sainia a tatou feagaiga. Ua fai lava si tuai o le toto a tatou. O le tele o le naunautaiga ia faagasolo polokalame ina ia mafai ona faasoa atu i isi itumalo. Ae ua tuai le toto ma galulue faatasi ina ia mafai ona faataunuuina leni faamoemoe. O le ala foi lea ua tau tuai ai le faatinoina, ona e le o gaoioi a tatou itumalo. Aepeitai o tatou feagaiga e sainia, o le taitaifono lava o le

fono faavae ma lana fono faavae lea e saina ai. E avatu ai la le tuualalo i sui usufono uma ua maea ona saina feagaiga, se i galulue ane ma tatou Matagaluega, ia ma galulue foi ma itumalo. O lo o i ai foi le faamoemoe o lo o galulue le Matagaluega ma nisi o afioaga u ai ai le latou faamuamua i le faasaoina, e le gata i le lauuta a o le siosiomaga foi ina ia mafai ona toe totoina.

Afioga Hon Lautafi Fio Selafi Purcell: Lau Afioga i le Fofoga Fetalai...

FOFOGA FETALAI: Malie lau Afioga i le Minisita se i tuu atu i le sui usufono mo Satupaitea.

Afioga Hon Lautafi Fio Selafi Purcell: O le mataupu sa ou lauga ai ananafi, lea ua faalogologo atu, ua toatele Itumalo ia ou te faalogo atu lea e aafia. A o lau faafesili ananafi, o le a le ituaiga criteria na fai e le Matagaluega e filifili ai Itumalo nei. Aua o lea ou te iloa e le i oo atu a leni polokalame i le matou Itumalo, ia tailo ai i isi Itumalo i autafa. Ae na ona fia malamalama foi pe na faapefea ona fai le selection criteria na ala ai ona faamuamua, po o le faamuamua ona o Nuu na ua aafia le latou vaomatua, po o lea le tulaga e i ai. Po o le a le tulaga foi lea e fia malamalama ai lau Afioga.

FOFOGA FETALAI: Tulai mai lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai faafetai atu foi i le sui. E moni o lea sa faailo foi le finagalo. Lau Afioga i le Fofoga Fetalai e pei ona fesiligia po o a criteria. Muamua, sa vaevaeina i Upolu ma Savaii, e i ai ni Itumalo i Savaii, i ai ni Itumalo i Upolu.

Lua, o Itumalo o lo o i le tausaga muamua ma le lona lua o lea sa vaai i Itumalo ua i ai ni latou polokalame ua faatinoina ai poo faasao ia iai ni faasao ma le vaega o i fea Itumalo o loo manaomia le toe vave totoina, aemaise lava vaega o loo iai tatou eleele apovai. E pei ona matauina ma molimauina foi i le tele o lologa ia e le i leva tele atu nei. O Afioaga nei o le a faapea foi ona ave i ai le... silasila i ai le Matagaluega ma galulue ai. A o se fesoasoani i le afioaga i le sui usufono, ia taoto mai lou finagalo o lea toe vaavaai foi i ai le Matagaluega e le gata o le togalaau, a o le vaega tonu lea e pei ona e saunoa i ai i aafiaga o le tai i lologa.

O lea foi e matauina e le tatou Matagaluega i aafiaga o le Itumalo mai le tatou king tide lea sa i ai le tausaga ua tuanai. E tele lava leaga i lea foi le vaega o le tatou atunuu, e faatauina ai aafiaga o le fesuiaga o le tau ona o aafiaga o eleele tumatafaga.

I le Afioga i le sui usufono o Safata 1, e moni ae o lo o silasila i ai le tatou Matagaluega i le talosaga lea, ae ao pea ona faailo. Na ou asia le tatou Afioga lea o Saanapu ma Sataoa. Lau Afioga i le Fofoga Fetalai, ua ou faanoanoa lava i le faiga muamua o taligalu o Afioga ia, ua tele atu le aafiaga o le siosiomaga la ua i ai i le faatulagaga lea na fai ai le taligalu. I le tuaoi o Saanapu ma Sataoa sa vaiti lava le alavai. E fai atu le taligalu ua toetiiti 50-100mita le va o le vai, lea ua alu atu ai le sami ma ua tele a silasila i ai le taimi lenei, o tuamaota o Saanaputai ua tele ina pepe uma le togo ua alu atu ai le sami.

O le ala foi lea ua toe vaavaai i ai po o se faiga e ao ona faaitiitia ai aafiaga nei ona ua tele ina alu atu le sami i tua o tuamaota o aiga foi, ae ua leva na faatino ia taligalu i Saanapu ma Sataoa. O le fuafuaga foi atonu sa iai i lea vaitau, e uma taligalu ia ona lelei ai lea o le siosiomaga o le Itumalo. Peitai ane ua sili atu le aafiaga lea ua i ai i nai taligalu.

O le fautuaga foi lea i o tatou Afioga ma Alalafaga aemaise tatou sui usufono o le Palemene, o le naunautaiga lava ina ia vaavaai po o le a le ituaiga coastal protection e fetau ma lea vaega. O le tele foi o afioga ua fai taligalu ua sola le oneone, ua tele ina pala. E ao a la ona fua le ituaiga taligalu, po o se beach replenishment, poo seawall e tu ai autafa, po o le toe toto o laau ina ia tau taofiofi ai aafiaga ia o le fesuaiga o le tau. O vaega ia lau Afioga i le Fofoga Fetalai e ao ona silasila i ai e fautua ai foi ma feiloai ai foi ma Afioga pe a oo ina faatino le tatou polokalame lau Afioga i le Fofoga Fetalai.

Afioga Leana Ronnie Posini: Lau Afioga i le Fofoga Fetalai.

FOFOGA FETALAI: Ia malie lau Afioga i le Minisita se i tulai mai leaga o lea ua taua le sui usufono o Safata 1.

Afioga Leana Ronnie Posini: Ia faafetai tele a, e sao lelei le saunoaga a le Afioga i le Minisita, a o le matau a Nuu o lo matou Itumalo, o le malosi lea o galu, o galu lea alu atu aemaise a le taimi ua vaai i ai le tele o le suiga o le taimi e tai o'oo'o ai ia le tai. Ua aafia uma a tuafale o Aiga e oo a i Maota ma Laoa la e iai ua alu atu a le suatai lea alu atu agai i totonu o le afaina lenei o le matou lea vaavaai.

Ou te lagona foi o le mea lea ua saunoa ai le Afioga i le Minisita ua vatele, ona o le talitonuga o le suiga o le tau lea ma le tai. Lea foi na aafia matou i le galu lea i le tausaga talu ai na matua oo mai le mea o lo o i ai le falesa le galu lea, pei o le matou faitau le ai le tulaga lea. Ae moni lelei lava le saunoaga a le Afioga i le Minisita ma le agaga faaaloalo.

Afioga Sulamanaia Fetaiai Tauiiili Tuivasa: Lau Afioga i le Fofoga Fetalai pe maua se avanoa, lau Afioga. E pei o lea e matau atu i le saunoaga

a le Taitaifono Komiti, e lua a Nuu lea sa saunoa i ai o Laulii po o Nofaalii ae pei e tau faalogologo i le saunoaga a le Minisita o lea la pei ua alu ifo a te i ua oo ifo a i luga Saanapu. Pei o le popolega lena e le i taua e le Taitaifono o le Komiti o Tupe, mataulia foi o le Komiti o Tupe e agai mai ai Matagaluega a le Malo, a o lea sa i lalo a lea pei ua e pei o le faanoanoaga lena i lenei taeao. Sa saunoa a le Taitaifono e lua a Afioga.

FOFOGA FETALAI: Ua uma foi le taimi o le Taitaifono. O le taimi o le Minisita lea ua saunoa, saunoa lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai, e leai o le taumafai lava e faailo atu ia vaega e pei ona saunoa iai ia sui usufono mamalu ona o lea foi ua uma ona iai sina malamalamaaga ma asiga a le tatou Matagaluega e faailoa atu ai, ae o lea lava ua i ai a tatou priority areas.

Lau Afioga i le Fofoga Fetalai ona ou see mai lea i le vaega lea o le aoina o le lapisi ma otaota. Ou te faamoiina lau Afioga i le Fofoga Fetalai i saunoaga a sui usufono o le Maota. Ou te matau i le taimi o le Koviti pei sa le tele ni lapisi atonu o le le feoi tele o le tatou atunuu, ae talu ona toe tatala a tatou auala, oka oka se agaga faanoanoa lau Afioga i le Fofoga Fetalai ua toe tauai le lapisi tiga na i ai tatou lapisi i totonu o Afioga ma Alaalafaga ma le tatou taulaga foi, ae tausolomua i le tatou atunuu le le faaaogaina. O le tuualalo la ma le talosaga foi e le gata i le lautele o le tatou atunuu ae faaoo atu i tatou Fono Faavae, lea foi ua amatalia e si au Fono Faavae i le matou Itumalo, o le faaaoga o se vaega o le \$1 miliona pe afai e i ai se taimi e malie ai le finagalo o le Minisita e faamatuu mai se matou seleni e totogi ai nisi o Afioga e latou te aoina le otaota, le lapisi lea leaga e faigata e o atu taavale ma tauai lapisi i lalo. E i ai foi isi tamaiti e feoi ae a faaaoga i ai se vaega lea o le galuega foi lea e taumafai ai ona faamama ai ia totonu o aai, aemaise lava tafaala ae fautuaina foi le tatou atunuu o loo taumafai pea le tatou Malo e faatino polokalame faalauaiiiloa i tatou avetaavale, o pasi ma le vaega lea o le lafoai o le otaota.

Lau Afioga i le Fofoga Fetalai ona ou see mai lea i le isi vaega lea o le auaunaga a le Matagaluega, e avatu malu i puega pe afai ua i ai se le atoatoa o le auaunaga a Matagaluega i le aoina o le lapisi. Ae afai lava o le fautuaga, a le alu atu loa le loli lapisi e tatau ai ona logo mai lea o le Matagaluega, logo mai le Matagaluega ona fai loa lea o le galuega i Konekarate. Ona o lea ua ave i ai le faatuatuaga o le tatou Malo i Konekarate ao lapisi ma tau ai aso e ao ai a latou lapisi. Afai la ua le faatinoina ona logo mai lea o le Matagaluega o i lea e mafai ai ona vave faafoia ai nei aafiaga.

Ua iai foi ia polokalame a le tatou Matagaluega ua toe faaopoopo ai nisi o zones, matauina o zones ia ina ia tele konekarate ina ia lava le taimi e ao ai le otaota ma le lapisi aemaise i inei i vaega tu taulaga ona ua tele auala fou,

ua tele fale fou, tele aiga fou e ao ua laitiiti le taimi e faatapulaaina e Konekarate e mafai ona ao ai ia lapisi.

O se fesoasoani atu lea i lau Afioga e le o tuua ai le vaavaai pea o le Matagaluega po o a nisi auala e toe faaleleia ai. O lo o i ai foi le fuafuaga i le tatou Tala o le Tupe ma le Polokalame e iai tatou vaega foi ia o eleele e le o i ai ni afioaga ma ni alaalfaga po o vaivao ina ia mafai foi ona faataoto le aoina o lapisi i ia vaega ona o le konekarate o lo o i ai nei, na o le au moa vao ma ao le lapisi.

A silasila i ai o le tele a o le isi au moavao e moa atu a ma lapisi na ona uma a na moa taatia ai a lapisi ae le aoa. O le faamoemoe lea lau Afioga ina ia mafai ona toe faafoi le tatou atunuu i le matagofie aemaise o le tatou sauni atu i le tatou taligamalo.

Lau Afioga o le Fofoga Fetalai ona muliai lea o se faamatalaga i manatu foi sa faaalua i le tatou atinae o tagata tafafao mai fafo. Ia matauina lau Afioga i le tausaga ua tuanai, lea foi na faaalua e nisi o sui o le tatou Palemene lenei faatalalanoaga le utiuti o le seleni o tuu atu i le tatou Pulega o tagata tafafao.

E i ai le upu foi lea is not how what you have but it how you use it. A silasila i ai i le seleni na faamatuu atu i le tatou Pulega o Tagata Tafafao ae i totonu o le 10 masina talu ona tatala tatou border, ua sili atu le aofai o tagata tafafao mai silia ma le 117-120 afe tagata ua oo mai. E eseese a auala o le tele foi o i latou ia o tagata o le tatou atunuu o alo ma fanau foi po o aiga ua leva na taofia borders lea ua asia mai, a ua iai foi tatou faalauiloa ua siitia ai le tatou auaunaga pulega o tagata tafafao. Mai lea vaega lau Afioga se tapenaga foi a le tatou pulega faailoa ai ua silia male 90% kamupani poo Faalapotopotoga Tumaoti sa o latou faatinoina ia auaunaga tau tagata tafafao lea ua toe talai, lea ua toe faafaigaluega tagata.

O le a se vaauga lelei ona e tasi lea o atinae aupito sili na aafia i le taimi o le tatou Koviti. Lau Afioga e le gata foi i lea o tatou meli, i totonu o lenei 10 masina e silia ma le 18 meli tusa lea ma se 30 afe tagata tafafao ua oo mai i totonu o le tatou atunuu. O se fuainumera tele ma o i latou foi o lo o faapea ona maua ai faamanuiaga ia o Taxi, o i latou faimeataulima, o tour guides na faapea foi ona oo atu.

O le auga o se faamatalaga lau Afioga i le Fofoga Fetalai, e ui ina utiuti le seleni na faamatuu mai le tausaga ma le tausaga nei, ae o loo silasila totoia le Matagaluega ma le Pulega i auala e mafai ona siitia ai le tatou auaunaga ia ma faalauiloa lea o tatou atunuu mo tatou turisi. O faapea foi ona...

Afioga Hon Lautafi Fio Selafi Purcell : Lau Afioga i le Fofoga Fetalai...

FOFOGA FETALAI: Ia malie lau Afioga i le Minisita, ia se i tulai mai le sui o Satupaitea.

Afioga Hon Lautafi Fio Selafi Purcell: Ia e faamalo atu i le Afioga i le Minisita i lau mataupu lea sa ou talanoa ai lau Afioga i le Minisita i le faaitiitia lea o le Tupe. E sao lelei a le faaupuga lea is not what you have but it how you use it. But it is always better to have enough. Ona faaogataua lea o le a fesiligia ona o le tausaga lea na tea e \$9 miliona le tupe lea na faaalu ae o le tausaga lenei ua pau i le \$7 miliona. E tasi ma le afa miliona lea ua aveese lea na ou lauga, sa ou faapea o le uunai i le taimi lenei lau Afioga ma le... ina ia aua nei toe pau i lalo le tupe, se i faamautu lelei ona toe taoto lelei le tatou industry lea. Aua o le Industry a lenei tatou te tua i ai ma o lea a manino mai a, ae o le tulaga lena po o lea le mea ua faapau ai lalo le tupe lea toe taumafai e faagaioi ai le tatou turisi i le tausaga lenei, aemaise o lo o tua atu i fonotaga ia e tuu mai lea sa aveatu ai le... Ae fia maua sina malamalamaga po o le a le tulaga o i ai.

FOFOGA FETALAI: Ia tulai mai lau Afioga i le Minisita.

Afioga Leana Ronnie Posini: Lau Afioga i le Fofoga Fetalai.

FOFOGA FETALAI: Ia e iai se mea, le sui usufono o Safata Nu.1.

Afioga Leana Ronnie Posini: Faafetai tele i lau Afioga i le Fofoga Fetalai masalo e tasi lea Mataupu sa oo iai se tala a lenei Itumalo ona o mea ia o le Turisi ma le faalauiloa o le tatou Atunuu i le Lalolagi. Lea foi na alai ona oo lau tala i mea ia o ata tifaga ia ua tapue i totonu o le tatou Atunuu aua o le mea moni a lau Afioga pei o le ata lea o le Survivor. E masalo e faitau fia miliona ma miliona tagata o lo o matamata ai, tagata uma nei, ae pie atu o Samoa lea e pue ai. O le ala foi lea na tau vavao ai le tatou Maota ae taua ia te au foi lea, o lea foi ua toe agai mai le au pue ata tifaga lenei. Na pue foi i le tausaga na tea nei ae le uma a le fia omai i totonu o Samoa, o le tele ia o le faalauiloa a le ata tifaga lenei i totonu o le Atunuu. O le ala foi lea na tau fai ai se tala i le tulaga ia tele le tatou faalauiloa....

FOFOGA FETALAI: Ia lea ua maua atu.

Afioga Leana Ronnie Posini: Ia ma ave ai tupe a le tatou Malo aua o le tele o le Turisi, o i lea e tele ai le tatou tupe maua.

FOFOGA FETALAI: Ia lea ua maua atu le finagalo o le Sui.

Afioga Leana Ronnie Posini: O lau fesili la i lau Afioga i le Minisita sina fesoasoani aua le ata tifaga lea ua tapena mai, e faamoemoe i le masina ia Aokuso ma le agaga faaaloalo.

FOFOGA FETALAI: Tulai mai lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai, ia mo le fesoasoani atu foi i le faafesili a le Sui o Satupaitea. O le isi vaegataua o lo o iai i le tatou polokalame i le Tala o le Tupe a le tatou STA (Samoa Tourism Authority) ua maua le faaopoopoga o le fesoasoani a Ausetalia, e ala lea i le TAUTAI Program lea la a faasilasila iai le Pulega e faatino ai ia le tele o nisi o maketi i totonu o Ausetalia ma fesoasoani foi i totonu o le tatou Atunuu. Ua iai foi le polokalame a Niu Sila o lo o faapea ona faamatuu e tapena ai ia tatou sites ina ia faaleleia ia ma vaavaai foi nisi o mataaga fou e ono mafai ona faaleleia. Ia ma faalauaitele atu foi ia tatou Afioaga ma Alalafaga tele o nisi o mataaga ae le o mafai ona silafia e Afioaga ma Alalafaga e ono maua ai ni a latou atinae mo tagata Turisi. O isi ia o vaega faaopoopo ia ma se tasi o vaega o le grants i le tausaga ua tuanai sa lei mafai ona faaoga ona o lea na tuai ona tatala tatou borders. O vaega ia e tolu ia ua iai tatou seleni faaopoopo.

O le isi foi vaega lau Afioga i le Fofoga Fetalai ia pei ona taua foi ma saunoa iai le Afioga i le Tamaitai Minisita o Tupe ia le tapenaga o le CHOGM (Commonwealth Head of Governments Meeting). Ia o lea iai isi vaega o le tapenaga lea o lo o iai isi vaega e fesoasoani mo le tapenaina o tatou ainae faatagata tafafao. O lo o iai foi nisi o fesoasoani i le tatou Development Bank ma isi tatou Kamupani Tumaoti a le Malo e mafai ona asia e tatou atinae e fesoasoani iai. O auala ia pei ona tau aveatu ai se vaivaiga lau Afioga.

Ae mo le Sui o Safata, faafetai i lou lagolagoina o le atinae o le Survivor. Ia lau Afioga i le Fofoga Fetalai o le Kapeneta sa feutagai ma lea Kamupani, tasi lea vaega pei ona faailoa atu o le faaoga tatau o tatou seleni ma auala e mafai. O lea la na ioe ai latou e omai mo le tausaga ua tuanai ma le tausaga nei e pue i Samoa latou faamoemoe. Ia o feutanaiga ia ma auala foi oa fesoasoani ua mafai ona faatino e le Malo ia a o le naunautaiga, o le tele ia o le promotion. Pei e moni ai le saunoaga, 10 vaiaso o faaalu le ata lea o le Survivor i Ausetalia, tele o tagata ua autovaa mai ia lea na matamata ai i le Survivor. E iai foi la isi atinae o lo o fuafuaina ma sa faatinoina i totonu o lenei tausaga faaletupe pei o le Koneseti a Motherland ia o nisi o faamoemoe lea e tau autovaa mai e le gata o tagata tatou alo ma fanau o lo o i Atunuu i fafo, ia a o nisi foi o faamoemoega. O le tausaga nei o lo o faamoemoe ia Aokuso e fai ai le tauvaga tele lea o le World Outrigger Distance, e 22 i le 30 Atunuu o le a autovaa mai ia ma faatinoina foi latou competition iinei Samoa. Ia tasi foi lea auala o lo o faapea ona galulue ai le tatou Pulega, e le gata i lea e pei ona silafia taaloga lakapi o lo o fai nei ae o le masina foi e fai ai taaloga ia a le PNC (Pacific Nation Cup). Ia o vaega uma nei o lo o faapea ona silasila iai le Pulega ma isi foi o events e mafai ona faalautele ai le

coverage a tatou ona e le mafai ona faatusa e tatou seleni i isi Atunuu ia pei o Fiti ma Rarotonga e tele ia avenues e mafai ona promote ai latou. Ae o lo o tatou vaai i tatou small wings ia e tele ai se tatou atinae lau Afioga i le Fofoga Fetalai.

Ia lau Afioga i le Fofoga Fetalai....

Afioga Hon Lautafi Fio Selafi Purcell: Lau Afioga i le Fofoga Fetalai...

FOFOGA FETALAI: O lea ua tali le manino le Minisita i le mea sa e laga.

Afioga Hon Lautafi Fio Selafi Purcell: Ioe. Leai e...

FOFOGA FETALAI: Ua iai foi le fautuaga a le Nofoa o le tali a la a le Malo, o le tali a le Minisita o la foi ua iai a latou fuafuaga ma faiga faavae.

Afioga Hon Lautafi Fio Selafi Purcell: Leai, e le o faiatu e sui le tali a le Afioga i le Minisita na o sina fautuaga e aveatu i le Minisita leaga o le mea lea sa ou talanoa ai ananafi. Lea e saunoa mai le Minisita ua 125,000 ea tagata i le 10 masina a o lea ou te talanoa atu i le saunoaga a le Tamaitai, ia atonu a e fetau 77,000 tagata malaga mai Samoa. O se fautuaga lava ma se tuualalo, e manaia a pe a faamoti mai a tagata tafafao, Tourist i tatou faamaumauga nei. Ona iloa lelei a lea, how the Tourism Sector is performing.

FOFOGA FETALAI: Ia, o lea ua maua atu le finagalo o le Sui mamalu, lea ua faafofoga mai le Minisita ma le Matagaluega.

Afioga Hon Lautafi Fio Selafi Purcell: Ae aveese mai tagata o le tatou a Atunuu lea e omai i faalavelave ma omai e tafafao. Na ona ou tuualalo i lau Afioga.

FOFOGA FETALAI: Tulai mai lau Afioga i le Minisita e faaauau lau Saunoaga.

Tofa Hon Tuuu Anasii Leota: Lau Afioga i le Fofoga Fetalai.

FOFOGA FETALAI: Ia le Sui o Siumu e iai se mea o..

Tofa Hon Tuuu Anasii Leota: Ia, sa leai a se manatu e faalavelave i le saunoaga a le Afioga i le Minisita. Ae ona o se mataupu lea sa ou laga a o lea o le a faaiu le saunoaga a le Sui mamalu. O lea foi ua taoto atu i le Afioga i le alii Minisita le talosaga a lenei Itumalo, sina fasi fanua i le mea o iai le

faasao a le Malo i le va o matou ma Falealili, sina fanua sei aumai sei fau ai le matou Falemai, lea sa ou taua i lau lauga ma lou faaaloalo. Manuia le fonu.

FOFOGA FETALAI: Ia lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai, e muamua ona aveatu le faafetai i le fautuaga lea ua faamauiina, o le naunautaiga foi lea i le fautuaga a Satupaitea. O lo o taumafai nei e disaggregate ia tatou types o tourist ona ou te oo mai foi au, e tasi lea vaega sa ou atugalua iai. E sau le tatou numera e 180,000 i le 200,000 a o le tele o tagata ia o tagata Samoa ia e nonofo inei. O lea la e taumafai ai e faatulaga poo ai a tatou tagata Samoa o lo o i fafo ma toe omai, o ai ia tagata ia e omai o tatou aiga. Ia ae po o fea foi ia Turisi a ia Tourist po o ai tagata Turisi e omai e tafafao poo ai tagata Turisi e omai i fonotaga, o ai tagata Turisi e omai i taaloga. O le faamoemoega lea a taoto mai se ata faapea ona tatou iloa foi lea le ituaiga maketi po o fea vaega tatou te target iai ia ma faatusatusa foi ia tatou faletalimalo. Pe o le tele o tatou faletalimalo o tagata e omai taaloga e le manaomia ia five star hotel, po o le tele o tagata e manaomia five star hotel o le tatou tourism development lea, o lea e vaavaai iai ina ia fuafua lelei mo le alualu i luma.

Lau Afioga i le Fofoga Fetalai e faamalie atu i le Sui o Siumu, lea ua taoto mai le talosaga. O le fautuaga o lea ua faaleo ae talosaga atu ia faaoo mai pea se tusi pei foi ona taoto le talosaga a Falealili ia ma nisi foi o Afioga o le tatou Itumalo ona mafai lea ona iloilo e le tatou Pulega e ala i le tatou Komiti o eleele ia ma maua atu ai se tali vave. Ae afai ua iai ia se talosaga ia o le a toe vaavaai iai po o le a se vaega e ono mafai ona faatino. Ae ao pea ona ou soso atu i le tulaga lea aemaise lava tatou eleele faasao ia i Togitogiga ona o le manulauti foi po o le ala na alai ona fai eleele faasao nei ina ia puipuia ai ia le tatou siosiomaga. E faaoga e toe faalautele atu ai laau Samoa ma meaola Samoa i isi vaega o le tatou Atunuu o lo o afaina.

FOFOGA FETALAI: Ia, sei tulai mai lau Afioga i le Sui o siumu pe iai se mea o...

Tofa Hon Tuuu Anasii Leota: Ia faafetai lau Afioga i le Fofoga Fetalai. Leai lau Afioga i le Minisita masalo pe ua lua masina talu ona ta feiloai tuuina atu le talosaga tusitusia a lenei Itumalo, silafia foi o eleele a nei o eleele o lenei Itumalo. O lea ou te ui a auala filemu ma le faaaloalo.

FOFOGA FETALAI: Ia lau Afioga i le Minisita.

Afioga Hon TOEOLESULUSULU CEDRIC POSE SALESA SCHUSTER: Faafetai ia atonu a maea le tatou Palemene ia ona faatino lea

o le fonotaga a le Komiti o eleele atonu ua oo iai le talosaga ona maua lea o se auiliiliga o lea talosaga.

Lau Afioga i le Fofoga Fetalai na o si fiapai a i le vaega lea o tatou faletalimalo ma tapenaga mo le CHOGM. Ia e iai a se naunautaga o lou nei tagata ia taumafai a ia tele le faaaogaina le gata o faletalimalo a o apitaga foi o aiga ma rental places, o ABB, (Air, Bed and Breakfast) ia e iai i totonu o le tatou Atunuu i le tapenaga lea. O le taimi nei i se taimi lata mai o lo o manaomia ni rooms e lata i le 2,000 o lea la e talosaga atu ai, ua fai foi faasalalauga a le Pulega ma le Komiti foi o lo o tapenaina lea vaega e mafai ai ona aumai ia fale po o nisi o aiga o lo o fia faaaoga mo le taimi lea. Ae ia mafai ona tapena mamao atu ina ia faaitiitia ai ia potu manaomia. Ae talosaga atu ai foi, ia o le avanoa lenei ona ua tele ina faasalalau ia atonu e le o maua e nisi o aiga po o i latou foi e fia faaaoga lea avanoa.

Lau Afioga i le Fofoga Fetalai ia ua iu ai i se taumafaiga vaivai a lenei matagaluega, ia ae aveatu le faafetai tele i le Pule Sili foi ma sui o le matagaluega i le latou fesoasoani e faaleo e tusa ai foi o fanoga faapea ona faaali iai Sui o le tatou Palemene.

Ia afe ifo lea i si ou Itumalo, ia faafetai le tapuai tatou galulue pea atonu o le faamoemoe a ia mafai ona atinae le tatou Itumalo e le gata o alo ma fanau ia ae o le aumatutua. Faamoemoe foi a maea nei le tatou Tala o le Tupe ma le fonotaga a le Palemene o le a tatou feiloai loa e faagasolo le tatou Poloketi.

Ia lau Afioga i le Fofoga Fetalai pau lea o se faamatalaga ia manuia tele le fonotaga a Samoa.

FOFOGA FETALAI: Malo faafetai, malo saunoa i lau Afioga i le Minisita ia atonu o lea foi ua faamalieina foi finagalo o Sui usufono sa lagalaga nisi mataupu, ia lea foi ua maea ona e talifuaitau. O le mea lea, malo lava faafetai.

Ia ua oo mai le tatou faasologa i lau Afioga i le Minisita o Fesootaiga ma Tekonolosi ia ma le Palemene o Samoa, lau Afioga i le Minisita.

Afioga Hon TOELUPE POUMULINUKU ONESEMO (Minisita mo Fesootaiga ma Faamatalaga Tekonolosi): Faafetai tele lau Afioga i le Fofoga Fetalai, ia mo le avanoa o lenei usugafono, ia a o le Sui o lenei Itumalo e molimoli foi se auafa a o se tofa ea le Faigamalo aemaise le vaega tumaoti o fesootaiga aua le Fonousu a Samoa i lenei taeao.

E muamua ona faatulou le alafa o le Maota o Samoa, le afio o lau Afioga i le Fofoga Fetalai aea le Susuga i le Failautusi, mamalu o le Matagaluega o le Fono, afio le Afioga i le Taitai o le Malo le Afioga i le Tamaitai Palemia, Afioga Fiamē Naomi Mataafa le mamalu i le Kapeneta aea Sui mamalu i Minisita Lagolago. Faapea foi le afio o lau Afioga i le Taitai o le Itu Agai ma Sui mamalu o lena itu o le Maota, Sui Faipule aea le tapuaiga mau a Afioga i Faauluuluga o Matagaluega ae a Samoa ua potopoto ua tatou lipoi

i le Maota o Samoa i lenei aso. E faatulou foi i le faafogafoga tapuai o le Tafatolu faafetauagai o le Malo o Samoa i le afio o lana Afioga i le Faamasino Sili ae a le vasega o Faamasinoga, tapuaiga mau a le Afioga i le Ao mamalu o le Malo ma le Masiofo ae a le Sui o le Fono o Sui Tofia i lau Afioga i le alo o Salamasina lau Afioga Lesatele Lemamea Ropati ma lou faletua, ao le paia lava lea i Tama ma Aiga, Aiga ma latou Tama, i le Usoga Tumua ma Pule Aiga i le Tai ma le Vaa o Fonoti, ae a le motu i Sasae i lana Faigamalo i le Afio o le Kovana Sili le Fofoga Fetalai ma le Peresetene o le Senate, o Sui Usufono o Maota e lua. O le paia lava lea aua Faleagafulu, Faatuiolemotu Sua ma le Vaifanua Saole ma le Saleaumua ae a le laau na amotasi le tootoo o Faleula Faatui o le Motu, upu o Manuatele tulou, ae a le aufaigaluega totofi a le Atua oloo tapuaia faiva o lau Afioga i le Fofoga Fetalai ma le Palemene mamalu, faatalofa atu malo le soifua manuia i lenei taeao. O lenei taeao o le ogatotonu o lenei Paeaiga e lagona ai le faafetai i le Atua i lana Puleto ma lana Pule tofi ao le valaauina lenei ua tatou tuvae ai i le tausaga lona tolu o lenei Paeaiga, tumau lona agalelei ia Samoa ae a le Faigamalo le Afioga i le Palemia ma le Kapeneta oloo taumafai aua se atinae manuia o Samoa mo nei ma a taeao.

Si ou Itumalo afio o Aalaalagafa le la Nofa a Tulafale ae a le tapuaiga mau a Falealili ma Tauagaeseese ae faapea foi aufaigaluega totofi a le Atua i soo se fata taulaga. Malo le tapuai, malo le faitatalo. Lau afioga i le Fofoga Fetalai e taumafai atu se sao o lenei Matagaluega, o le mea lea faauluuluga a le tatou Sector lau Afioga Lefao aemaise lau Afioga Gisa ma Tupai aemaise lau Tofa Satama tapuai maia sei fai so tatou sao ia manuvao aua le Fonousu o Samoa.

Lau Afioga i le Minisita Lagolago lau Susuga i le Faipule Fuiono Tenina Crichton tapuaia maia ma le manuia.

Lau Afioga i le Fofoga Fetalai i le tulai mai o le Faigamalo i le 2 tausaga talu ai, o le tele ia o tulaga na faataoto faataatia aemaise foi fuafuaga e pei ona iai le tulaga o le taumafaiga o pisinisi, aemaise lava le tulaga o le atinaeina o le tamaoiga o si o tatou atunuu. E iai foi le talitonuga o faiga faavae mo le manuia lautele o ona tagata, peitai o le tulai mai o le Faigamalo amata mai lava i le amataga e iai le naunautaiga ina ia faamamaavega aemaise ai ina ia maua avanoa tutusa o tagatanuu o Samoa e atinae ai. O le fatu lea ma le ogatotonu lemu lea o lenei 2 tausaga ia tapena ai faiga faavae ina ia lelei le faataotoga o fesootaiga i totonu o le tatou atunuu. Ao nei faiga faavae oloo iai le vaaiga lautele ia maua fesootaiga i soo se tagatanuu o Samoa mo nei ma le lumanai, a ia maua ai i totonu o nei Faiga Faavae tatou Aga Tausili Faakerisiano aemaise tu ma aga faasamoa.

Lau Afioga i le Fofoga Fetalai, o fesootaiga o le isi lea poutu toa o Faigamalo lelei ma Pulega Lelei, i tausaga e tele ua tuanai i le oomai o Faigamalo ma latou faatinoga sa tatou amata i le tatou Post Office, faasolo mai ai lea na iai ma le tatou 2AP, oomai ai i laina telefoni lea ua iai lenei

vaitau ua tatou iai ma fesootai i telefoni feaveai. Tele itu lelei lau afioga e pei ona molimauina le taua o nei mea o fesootaiga ao tua atu oloo lagomau ai le faitatalo a le Faigamalo Lelei ma Pulega Lelei, e pei foi o le amataga o le fono i lena vaiaso ua tea lau Afioga, manino a mea uma pe a lelei fesootaiga.

Lau Afioga i le Fofoga Fetalai, soo se Faigamalo e tapena lelei faiga faavae ma Tulafono e lima taitaina ai le faatinoga o ana galuega. E le'o po se lilo, ia e pei lava ona tau faamatalatala mai lava lava i le amataga sa iai Tulafono o Falemeli, ia fai le fesuiaiga o na Tulafono, fai Tulafono o tatou laina telefoni. Ae o le Tulafono oloo iai le taimi lenei ua atoa le 17 tausaga ua tauau i le 20 tausaga. O le tele ia o fesuiaiga i totonu o le 17 tausaga lena. O le isi lea vaega lau Afioga i lenei 2 tausaga taumafai ai e toe iloilo e toe silasila toto'a i Tulafono ina ia mafai ona faataoto Tulafono e lima taitaina ai faatinoga o galuega.

Lau Afioga i le Fofoga Fetalai e faapena foi i Faiga Faavae, o faiga faavae e lima taitaina ai ina ia maua avanoa tutusa o Samoa uma i tulaga tau fesootaiga, aemaise foi e pei lava ona fai atu e faatumauina tatou aga Tausili faakerisiano ma la tatou aganuu faasamoa. O se auaunaga e matua tatau ma onomea ona oo iai soo se tagatanuu o Samoa, its now become in a necessity lau Afioga. E tatau ona oo uma i soo se tagata Samoa. Lau Afioga i le Fofoga Fetalai e pei ona taumafai atu i le tulaga o Faiga Faavae o se tasi lenei o faiga faavae oloo galulue ai lenei Matagaluega ma le Faigamalo, o le saga faataua atili o le tulaga o fesootaiga, masalo e le tau faamanatuina i lenei Maota le nofo silafia o le taua o fesootaiga. Peitai o le silasila a le Afioga i le Palemia ma le Faigamalo e tatau ona laina tutusa ma le auauanga o le Suavai ma le auaunaga o le Eletise e le mafai ona tatou o e aunoa ma fesootaiga. Ia malu puipua e le Malo le tulaga o fesootaiga e le tatau foi ona tuu atu se faamoemoega o le Malo ini Psisinisi Tumaoti i le vaaiga o fesootaiga aisea, o Faigamalo Lelei ma Pulega Lelei lau Afioga i le Fofoga Fetalai.

I le taimi nei i le access o le tatou atunuu atoa ua oo atu lea i le 97%, o le coverage o le tatou TV tali tutusa faapena lau Afioga. Peitai e tele isi galuega e ao ona faaleleia oloo galulue foi ai a tatou Kamupani o tatou Services Provider ua tuuina atu ai le auaunaga ina ia ao ona faaleleia lau afioga. E le'o po foi malaē i lenei Maota o se auaunaga o se auaunaga faapitoa e le taugofie lau Afioga, a tuu se faatusatusa i le auala ma le eletise atonu e atoa le 20 tausaga e tumau ai le technology o le auala, tumau le technology o le eletise peitai i le fesootaiga o lea ua tatou matau, o le 10 tausaga talu sa ese foi le technology o lea foi oomai i le taimi lenei ua sui foi. O lona uiga o taimi uma lava e sui, e sui foi equipments sui ia metotia e faaogaina sui systems a ia Kamupani e le taugofie lau Afioga i le Fofoga Fetalai aemaise ai le tomai faapitoa o tagata Inisinia ma i latou o e oloo vaaia nei tapenaga ina ia lelei fesootaiga i so tatou atunuu.

O le ala lea lau Afioga e iai atumotu laiti e iai Samoa aemaise atunuu tau-
ataie e ao ona aputiputi ma vaai lelei ia le tulaga lea lau Afioga i le Fofoga
Fetalai. Ona pei lava ona taumafai atu e le gata e taua ae le taugofie lau
Afioga. I le aotelega a fua Samoa i le Pasefika e 97 i isi atunuu uma o le
lalolagi e maoa'e le tulaga ua iai le tatou coverage ae pau a lea o le tapenaga
lau afioga o loo taumafai iai le Matagaluega e le gata i Tulafono o Faiga
Faavae o le capacity o tatou tagata o le faaauauina lea lau afioga ina ia
mautinoa e le motusia tatou fesootaiga ma e au uma i soo se tafa o le atunuu
tulaga tau fesootaiga e oo lava i tatou fanauiti lau afioga.

I le tulaga lona lua i le atinaeina o lenei Vaega Tumaoti o le tulaga lea o le
tomai o tatou tagata, e taua lenei faamoemoe lau afioga, e pei a ona silafia e
mafai ona fou le taavale ae a le silafia e se ave le taavale tulou, ona taavale
pe leai foi se laisene e le talafeagai. O le naunautaiga lea lau afioga o lenei
foi Vaega Tumaoti Taufesootaiga ina ia maua silafia uma e tagata Samoa i
lenei vaitau ma le lumanai faaogaina tatau o fesootaiga o le ala o le naunau
o le Afioga i le Palemia mai lava i le amataga o le tatou free internet i alo
ma fanau faafetai i le Atua uma lelei lenei aso o le tatou Fono e lei saunoa
se tasi i lea tulaga tau internet o Aoga, faafetai i le Atua i lana faasoa aemaise
foi o le Tofa manino i le Afioga i le Palemia ina ia lelei le internet i Aoga
uma lau Afioga i le Fofoga Fetalai.

E faafetai atu ai i le Matagaluega o Aoga tauala atu i le Afioga i le Minisita
ia aemaise foi le Kamupani sa fesoasoani mai, ia ma le Matagaluega e i ai
lea galuega. E le faigofie. O le manulauti sa i ai le \$2 miliona lea i le tausaga
muamua, ia foia le faafitauli. O lea ua 2 tausaga, talosia ua foia le faafitauli.
E i ai le talitonuga, ia ua tele lava ina foia. E i ai aoga e 53 o lo o totoe, o lea
foi ua faataoto le fuafuaga mo aoga ia. A o le 53 lea, e amata ai se tapenaga
fou a le Matagaluega ma le Malo i le toe faaleleia atili o a tatou fesootaiga.

I le tulaga o le tomai o tatou tagata lau Afioga, o le vaega lona lua, o le
atinae o le Matagaluega. I le tulai mai o le faigamalo lau Afioga i le Fofoga
Fetalai, ua tele ina outsource le tele o auunaga. Peitai o le vaai a le
faigamalo i le Afioga i le Palemia ma le faigamalo, e le o tele ni a tatou
seleni. O le agaga lea lau Afioga o lo o taumafai ai e aputiputi le resource
ma toe tapue le tomai aemaise foi le faatinoga o galuega i totonu o le
Matagaluega. O lo o taoto atu i le Komisi o Tagata Faigaluega a le Malo le
talosaga a le Matagaluega, a o le agaga lea lau Afioga, o lo o... a silasila i
tatou service providers o lo o i ai i le taimi lenei, o top engineers o lo o i
totonu o le service providers o i latou sa tapue atu i totonu o le SamoaTel. O
le tele o inisinia o lo o galulue ma ua seei mai ma ua avea ma faauluuluga o
ia Matagaluega, both Vodafone ma le Digicel. O inisinia sa tapue atu i
fuafuaga a le Malo sa faataatitia.

O le naunautaiga, e pei lava ona tele sauoga i le Maota lenei, sioti inisinia,
sioti fomai, sioti loia, professionals, specialists. Ia o le eseesega o faiga
faavae sa faataoto ai le outsource. A oo ina sii i luga le tau, e le gafatiataulima

e le Malo. E pei o le isi lea vaega lau Afioga sa taumafai ai le faigamalo e toe atiae le Matagaluega. E le gata i le faatinoina o galuega, a o lana role i le vaai lea o auunaga e pei ona i ai.

O le isi vaega lau Afioga ina ia siitia le tomai o tatou tagata, o le atiaeina o tatou nuu i tua. E le i mavae atu ne isa faalauiloa ai le tatou taiala po o le sector plan, taiala a lenei vaega tumaoti, fuafuaga alualumamao a le vaega tumaoti. O lo o taoto i le Laulau-a-Fono a le Kapeneta fuafuaga o le tatou Digital Transformation. I totonu i lenei Digital Transformation, se tasi o vaega taua o lenei atinae ia faatuputeleina ma atiae ma tapue ma faalauteleina le tomai o tatou tagata i tua. O le isi lea lagolagosua i le atinae a le Malo e ala i lana \$1 miliona. E le gata ina avatu seleni, ae avatu foi ma le fesootaiga ina ia faamamaavega ae le gata i lea ia lelei fesootaiga mo fefaatauaiga, aemaise galuega ina ia faafaigofie, faamamaavega i le faatinoina o galuega lau Afioga. E le gata i lea i atinae, e oo foi i le auunaga a le falemeli. E ao ona silafia Savaii, o nuu i tua, o lo o i ai atoatoa le auunaga i le tatou falemeli. O lo o taumafai foi ina ia mafai ona siitia le auunaga a le falemeli i le taumafai lea e i ai nai banking services, ia ma auunaga e mafai ai ona faaoga cards ma tulaga faapena e atili siitia ai le auunaga mo tatou tagata.

Lau Afioga i le Fofoga Fetalai, o le vaega mulimuli o le siitia, ua saunoa nisi o faipule o le Maota i le tulaga o le Survivor. A silasila i ai, e tele lava ina tatou... faafetai i lau Afioga ma le Failautusi ua tele ina matamata mai tatou tagata i fafo i le tatou Fono, aemaise foi o nisi o faasalalau. Ma o le agaga tonu lea o le Matagaluega o Fesootaiga, ina ia lelei tapu'e le tatou contact i Samoa nei e matamata mai i ai ma maimoa mai ai le tatou atunuu mai fafo, nai lo le tatou silasila i platforms o lo o i fafo. O le agaga ina ia mafai ona maua i Samoa nei tupe maua. E pei o le isi lea vaega, a o tapueina iinei ata tifaga e pei o le Survivor, o lo o taumafai foi le Matagaluega o Fesootaiga ina ia tapu'e le tomai o tatou tagata i le faatinoina o ia galuega o le pueina o ata. O le isi lea vaega lau Afioga e taua mo le lumanai, aemaise lava i le tulaga o fesootaiga ma le atinae o si o tatou atunuu.

O le vaega lona tolu lau Afioga sa saunoa foi i ai le tele o sui usufono o le Maota, o le puipuiga o tatou tagata, aemaise lava i tatou fanau i le tulaga pei ona i ai. E pei lava ona ou amata se folasaga a lenei Matagaluega ma le vaega tumaoti i agatausili o lo o faufau ai le tele o faiga faavae, manino ai tatou agatausili faa-Kerisiano, aemaise o le agaifanua. O lo o ua faatuina le tatou Cyber Security Division e silasila i vaega nei. O se tasi o latou galuega muamua lau Afioga i le Fofoga Fetalai, o le taimi nei ua amata ona active le tatou filter, ua uma ona tuuina i totonu o galuega a se tasi o service providers. O le isi o lo o faatali lava le latou ioega ma le faatinoina o lea vaega. A o le filter lenei lau i Afioga, e filter ai vaega e le tataua ona silasila i ai a tatou fanau, tulou le Maota. O isi ia galuega i le puipuiga o tatou tagata ina ia faatumauina tatou agatausili.

Lau Afioga i le Fofoga Fetalai, o lo o agai mai foi ma saili e le Matagaluega, o lo o ua amata ona faaaogaina e tatou motu tuaoi e pei o Tutuila, tulou le Maota, le tulaga o service faapitoa, apps, e mafai ai lava e matua ona silasila i website ma tulaga o lo o faaoga e alo ma fanau. Peitai lau Afioga, e le taugofie. Ua silasila foi le Malo ma le Matagaluega i ai i se auala e faafaigofie ai ina ia mafai lava ona faamausali atili le puipuiga o alo ma fanau e pei ona popoe i ai le Maota.

Ia ma le vaega mulimuli lau Afioga i le aotelega o faiga faavae, ia siitia le auauunaga a le Malo. E le o po malae i lenei vaitau i le auauunaga a le Malo i le seleni tau faasoaso pei ona saunua foi le Sui Taitaifono o Tupe i le aso ananafi i le tulaga o le service e faatinoina ai galuega. O le isi lea vaega taugata lau Afioga o le tatou ICT. Ua taoto foi faiga faavae ma o lo o faasolo faatalanoaga i lenei vaitau i auala talafeagai e mafai ai ona faataugofie lea vaega. E pei ona silafia o le tele o nei auauunaga i lenei vaitau, e faamoemoe lava i le tekonolosi, le internet. O le tele foi o polokalame i luga o le computer, ia e faamoemoe lava i polokalame e tusia mai fafo. O le isi lea vaega lau Afioga ua agai i ai le tapenaga a le Matagaluega, ina ia mafai ona faamamaavega e faaitiitia ai foi tupe faaalu a le malo lau Afioga. Ia, o le aotelega lea o faiga faavae lau Afioga ma galuega lautetele a lenei Matagaluega o Fesootaiga.

I le tulaga o... e i ai nisi o sui usufono sa sausaunua i le tatou coverage ma le quality o le service, ia pei o le agaga lena. O lo o tapena e le faigamalo faiga faavae ina ia le gata e fesoasoani i tatou service providers, ae le gata ai, e le o galo si o tatou atunuu e utiuti le tamaoaiga, o avanoa tutusa o tagata uma. Pe i ai le galuega pe leai se galuega, i le mauoa ma le... ia e pei e faapena lau Afioga. O lo o iloilo totoa vaega nei ona e le taugofie le tulaga i le faatinoina o lenei auauunaga.

Lau Afioga i le Fofoga Fetalai, ona ou oo mai lea i nisi o sui usufono sa saunua foi i le aotelega o tatou atinae. E manatu o lo o manino lava i le atinae, e i ai foi nai atinae o lo o faatinoina e lau Afioga i le Fofoga Fetalai ma le Failautusi mo le atiaaina o le tatou Maota Fono ma le Ofisa o le Fono. Ia o tupe faameaalofa mai le Malo o Ausetalia o lo o talia ai le faatinoina o le tatou Maota Fono. O nisi foi o galuega o lo o talia sa faatupeina i le Tala o le Tupe talu ai, ia o lo o faagasolo lelei ma ou te talitonu o se taimi o i luma ona aumai foi lea i ai. E le i oo i ai se saunua a se sui usufono mamalu lau Afioga, ae na ona faailoa, i le afio o lau Afioga i le Fofoga Fetalai, e ao foi ona faamanino le Maota i le galuega foi o lo o fitaituga i ai lau Afioga i le Fofoga Fetalai ma le mamalu o le Ofisa o le Fono.

Tofa Hon Laufo Fonotoe Nuafesili Pierre Laufo: Lau Afioga i le Fofoga Fetalai ua tulai ma le faaaloalo e...

FOFOGA FETALAI: Ia malie lau Afioga i le Minisita se i tuu atu i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Po o le a se... pei lava sa ou taua le vaega foi lea, le pou foi lele, po o le a se saunoaga a lau Afioga aua o lea e i ai le vaega tau Fesootaiga. Le pou foi lea e i le Kolisi o Samoa lea pei e faalavelave i le o atu o vaalele i le malaevaalele i Fagalii, i se fuafuaga pe sifi le pou po o le a le mea e fai i ai ina ia maua ai se saogalemu i le approach, i le landing lea sa ou taua. E pei o le fesili lea ma le faaaloalo.

FOFOGA FETALAI: Ia se i tulai mai lau Afioga i le Minisita...

Afioga Hon Lautafi Fio Selafi Purcell: Lau Afioga i le Fofoga Fetalai, e fia faasao le taimi o le Afioga i le Minisita.

FOFOGA FETALAI: Ia, se i tulai mai le Afioga i le sui usufono mo Satupaitea.

Afioga Hon Lautafi Fio Selafi Purcell: Faafetai, leaga sa ou taua si au mataupu lea. Faafetai i le Afioga i le Minisita i le faamalamalamaina o faiga faavae i le alualumamao i tilotilo mamao a le tatou faigamalo. A o si au lava tamai fesili, pe i ai se fesoasoani mo au i le short term po o le medium term po o le a ou alu ai ia faapea e le maua se telefoni i uta i le vaimea lea ou te nofo ai, faamolemole lau Afioga.

FOFOGA FETALAI: Ia se i tulai mai lau Afioga i le Minisita.

Afioga Hon TOELUPE POUMULINUKU ONESEMO: Faafetai i le Afioga i le Taitai o le Itu Agai aemaise foi le Afioga i le Sui Matua o le Maota mo le fesili. Atonu se i tali atu pea le... Lau Afioga o lo o faatino galuega talafeagai, e le gata i le Pule Faatonu, aemaise foi o le Matagaluega o Galuega e tusa ai o le saogalemu ia mautinoa le saogalemu, femalagaaiga i vaalele, ia e faapena. Aua pei o lea e silafia e le Afioga i le Taitai o le Itu Agai le pou lea e pito mai, ae na te le o silafia le isi pou la e i le isi itu. E lua pou. E pei o le agaga lena. Ua maea ona faatino galuega, ave foi tusi e faasoa ai i le tulaga talafeagai. Faafetai.

FOFOGA FETALAI: Se i tulai mai le Afioga i le Minisita o Galuega. Se i tulai muamua mai le Minisita o Galuega.

Tofa Hon Olo Fiti Afoa Vaai: Lau Afioga i le Fofoga Fetalai faafetai o lea ua... e fesoasoani atu i le mataupu lea pei ona laga. O le tulaga lea pei

ona i ai le certificate foi lea sa luga lalo ai le tatou atunuu, o lea ua uma ona issue le certificate lena o le safety po o le saogalemu o le airport. O le pou lea, ia, e sao le tulaga lea pei ona laga mai i le concern lea i le pou o lo o tu ai. Ia manatua foi le pou lea o lea e tui le lotoa o le Samoa College, ma ua uma foi la ona faia le survey ma tulaga faapena. O le pou lena, o lo o i fafo atu o le sone saogalemu o le malae vaalele i Fagalii. Ae faafetai o lea lava e sili lava le mao i mea lelei. E sao lava le saunoaga. O lea lava a ma talatalanoa ma le Afioga i le Minisita o Fesootaiga pe mafai ona iai se isi fuafuaga ia o le faamauualalo po o le sifi ese, aua e tatau lava ona silasila mamao pea le Matagaluega o le tatou malae vaalele i Fagalii o le tatala tapuni, tatala tapuni sa le tatau ona iai se tulaga foi lea ia latalata se mea faapea i le malae vaalele, ae faigofie lau Afioga i le Fofoga Fetalai. O le a ma faasoa ma le Afioga i le Minisita o Fesootaiga ona fai ai lea o se fuafuaga faapena ma le agaga faaaloalo lau Afioga i le Fofoga Fetalai.

FOFOGA FETALAI: Ia malo faafetai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai...

FOFOGA FETALAI: Ia se i toe tulai mai lau afioga i le Taitai o le Itu Agai.

Tofa Hon Lauofo Fonotoe Nuafesili Pierre Lauofo: Ia leai ou te le agai i o i le saunoaga a le Minisita le Afioga ia Olo, ae sao o lea ou te le'i taua le isi pou lena ae sa'o, sa ou faapea e tau na'o le pou lea e pito mai a o lea ua e aumaia ma le isi pou ua atili ai ona telē le faafitauli. O le mataupu la lea e avatu ua le gata la ua le saogalemu le isi itu, le saogalemu le isi itu...

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Ia.

Tofa Hon Lauofo Fonotoe Nuafesili Pierre Lauofo: Ae ua telē atu ai ma le faafitauli lea ua tulai mai, ae pau a le mea lea e atugalua ai le taofi leaga tatou te le fai talasua foi i le mataupu leaga a aafia se vaalele, aafia le soifua o le tagata. O lea ua fealuai nei le vaalele ao la e lei sifia le pou, a tulai mai la se faalavelave o le a le tulaga e iai, o le mafuaaga lea, ae le'o faapea ose faitioga...

FOFOGA FETALAI: Lea ua maua atu le agaga o le Taitai o le Itu Agai,

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Ia tulai mai lau Afioga i le Minisita o Galuega.

Tofa Hon Olo Fiti Afoa Vaai: Ia o isi mau pou uma ia o lea e saunoa iai le Taitai o le Itu Agai, ia e pei a ona ou faiatu o loo mulimulitaia ia galuega ma atinae o mea tau malae vaalele ia latou Tulafono ia ma Speciation e fausia ai malae vaalele. E le malamalama ai la loia i le ma mataupu lena ma matou, o lea la e fai atu ai le matou galuega ae o lea na ou fai atu ai nei sei ma talanoa ma le Minisita o Fesootaiga i le pou lea. E manaia foi le concern a le Taitai o le Itu Agai, ia e pei o le tali atu lena, ae o le tulaga ia o la e sefe lelei le tatou malae vaalele ma le faaaloalo.

FOFOGA FETALAI: Ia tulai mai lau Afioga i le Minisita e faaauau lau saunoaga. Ia sei tulai mai lau Afioga i le Minisita o Faatoaga.

Afioga Hon Laauli Leauatea Polataivao Fosi: Ioe, o lea lava ta te autilotilo i le taimi lau Afioga, se lafo maia e le valea Pailate e le faapea o le a vaai atu lava i pou ae so'a. O le a alu le tatou taimi, tuu i le Minisita o Fesootaiga ma le Minisita o Galuega.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai o Pailate ia e talanoa mai ia te a'u lea e mafua ai ona ou tautala i mea ia,

FOFOGA FETALAI: O lea ua maea ona saunoa le Minisita,

Tofa Hon Lauofo Fonotoe Nuafesili Pierre Lauofo: O ave vaalele aua leaga o la e silafia foi e latou le latou galuega o ave vaalele.

FOFOGA FETALAI: O lea ua maea ona saunoa le Minisita, Taitai o le Itu Agai faalogo mai, faalogo mai ua tele foi lou solifono toetititi ona fai lea o se Lafo ia oe

Tofa Hon Lauofo Fonotoe Nuafesili Pierre Lauofo: Ia o lea foi faatoa ou tulai ao lea foi ua e saunoa mai ua ou solifono, ae faafefea le la itu...

Afioga Hon TOELUPE POUMULINUKU ONESEMO: Lau Afioga i le Fofoga Fetalai...

FOFOGA FETALAI: Ia tulai mai lau Afioga i le Minisita.

Afioga Hon TOELUPE POUMULINUKU ONESEMO: O le mea lea o le vaalele a fau le vaalele e tuu iai le safety factor foi lea. O le safety factor la o le fauina o le vaalele e laititi ao le safety factor o le faaola fanua ma isi

mea masani e pei o le faguvai e telē. O le mafuaaga lau Afioga i le Fofoga Fetalai e laititi ai le safety factor o le vaalele aua e le avea i se tagata e lei aoga lelei le vaalele, o le isi lea vaega lau afioga ona o le tulaga manino lena. E oo foi la lau Afioga i le vaalele ma le malae vaalele e le siakia e tatou iinei i Samoa le mafai ona faaoga le Certificate 139 o le vaalele, e sau le Pacific Aviation Safety Officer a le Pasefika ma siaki le malae vaalele ona faatoa mafai lea ona operate le tatou malae vaalele, o le mea lena na ona fesoasoani atu i lau Afioga i le Fofoga Fetalai.

Tofa Hon Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Malie sei toe tuu atu le avanoa i le Minisita o Galuega.

Tofa Hon Olo Fiti Afoa Vaai: Ona e iai e iai le fasi fuaiupu lea na saunoa iai le Taitai o le Itu Agai e fesili i le Pailate i le mea lea o le Safety. Malie lau Afioga i le Taitai o le Itu Agai e faatonu atu e le Matagaluega a le malae vaalele i ana Tulafono le Pailate i le mea e fai, o le saoga lena. Afai atu e le'o sefe ia aua le alu iai le Pailate e faapena, e ese foi ia Tulafono e mulimulitaia e tatou Pailate. Ao mea o le safety ma tulaga o le malae vaalele e auvatu la i le tatou Regulator a le Pulega lenei o Atinae Tetele lea e iai le MWTI lea e iai le tatou Civil Aviation o tatou Tulafono Faava-o-malo e pei ona saunoa le Minisita o Fesootaiga e mulimulitaia e a tatou Pailate ma le faaaloalo.

FOFOGA FETALAI: Ia lea manino ua manino lea vaega.

Tofa Hon Lauofo Fonotoe Nuafesili Pierre Lauofo: Ia lau Afioga i le Fofoga Fetalai, e leai se faafinauga i lea mataupu

FOFOGA FETALAI: Lau Afioga i le Taitai o le Itu Agai

Tofa Hon Lauofo Fonotoe Nuafesili Pierre Lauofo: E pau a le mea o lea mea lea e saunoa mai le Afioga Olo o la e iai le human factor, a iai a le human factor e iai foi le taimi e sasi ai, ua tele foi vaalele ua lavevea ona o le sasi o le pailate, ia o le tulaga lena ia e silafia

FOFOGA FETALAI: Lau afioga i le Taitai o le Itu Agai ua lapataia soo tele lau Afioga i le tulaga lea, e te tulai a i luga e saunoa ae e te le vaavaai mai i le, o le mea lea ua oomai i le mafaufau o le Nofoa, ia outou Afioga i le Kapeneta ua ou manao e faatu se Lafo pe a outou finagalo iai, leaga ua fai soo ua solifono soo, o le le vaavaai mai i luga e fai lona... ia o lea e lafo atu

ia outou le Kapeneta oloo i totonu o le tatou Tulafono Tumau. Ia lau Afioga i le Tamaitai Palemia

Afioga Hon Fiamē Naomi Mataafa: Ia lau Afioga i le Fofoga Fetalai e sa’o a oe, ae matou te talosaga atu i lou finagalo onosai ae atonu e fai fai a lelei le amio a le Taitai o le Itu Agai.

FOFOGA FETALAI: Ia faafetai.

Afioga Hon Fiamē Naomi Mataafa: O le tatalo lea i lau Afioga. Ma le isi mea a tatou o i le Tulafono Tumau o le toega o le aso e ave ai le tagata i fafo ae la e toe lima minute.

FOFOGA FETALAI: Ia faafetai ia o le measili ma taua o lea ua outou faafofoga mai i le finagalo o le Palemia ma le Kapeneta e faapena foi le mafaufau o le Fofoga Fetalai e ese le faaaloalo, e ese foi le tuu avanoa atu ao lea a e matau atu, ia ao lenei e matau atu aemaise lava lau Afioga i le Taitai o le Itu Agai e te tulai loa e u lelei mai lava ou autafa i le Fofoga Fetalai, o le mea lea o la’u lapataiga mulimuli lea i lau Afioga i le Taitai o le Itu Agai, o lea ua e faafofoga mai i le finagalo o le Palemia ma le Kapeneta e alolofa ia te oe, ia tau fai faimalie tatou mea. Ia sei tulai mai lau Afioga i le Minisita e faaauau le saunoaga.

Afioga Hon TOELUPE POUMULINUKU ONESEMO: Ia faafetai atonu e le’o toe tele foi. O le talosaga a le afioga i le Sui matua le afioga i le Sui o Satupaitea o le mea moni a ia i le tulai mai o le Faigamalo tausi le va o Pisinisi ma le Malo. Ae faafetai ananafi ia o le tulaga foi lea e le manao tele e faaoga le paoa faa-Minisita e faatonu ai le aufaigaluega tulou, na valaau mai le Vodafone ananafi ia o lea o le a agai iai e fai se pou e fesoasoani iai. Ae e pei o le eseese lea o faigamalo lau Afioga e faaoga a Tulafono e tausi ai le va, e allow foi services provider e faatino le latou auaunaga, aua o le latou auaunaga e faamanuia le Atua, e pei o le agaga lena lau Afioga ae a faatino le galuega i le faatonuga a le Faigamalo e pei e faapena le naunautaiga.

Ia atonu e faamaea atu ai se taumafaiga a lenei Vaega Tumaoti i lenei aso foi ma le tatou Usugafono e iai le talitonuga o le a se tulaga ua oo iai lenei Matagaluega ma lenei Vaega Tumaoti ia fesoasoani mai le Atua ioe, i finagalo foi o Sui Faipule atonu e le atoa lava ni i’a i le faiva pei o la lea upu, ia ae faamaulalo atu foi pe a le atoatoa fesoasoani mai le Atua ia atoa i se aso.

Ia o le, e pei a ona iai i le la vaiaso e ...i lena vaiaso faamae’a ai se.... Ia e aveatu se faamaisega i le tuua foi o le Malo e se tasi foi o poutu o le Matagaluega a le Susuga i le Failautusi ma le tatou Fono, tuua le Malo e

Talanoa Maria Ale. Ia e molimoli atu ai faamaisega i le Afioga ia Mataia ia po o Fetalai ia Levaopolo ia maua pea le faamafanafanaga. O upu a le Tusi, amuia e faanoanoa aua e faamafanafanaina. O le mea lea ia maua pea le toafilemu o le Atua i lau Afioga i le Failautusi ia aemaise lau Afioga i le Fofoga Fetealai ona o le afaigaluega. Lau Afioga e taua i lenei faigamalo le tautua a le afaigaluega a le Malo, o le tausaga lenei o se Tina sa auauna i lenei matagaluega mai a i le 1964 e oo mai le aso o lo o faigaluega, e 78 tausaga o le soifua. Sa amata galue mai as a Clerk i le Post Office ia avea'i, avea'i ia avea ma Ofisa Sinia i le 2000, ia tulai mai le Faigamalo i le 2001 sa avea ai ma Failautusi o le Minisita o Fesootaiga ia a o Faatoaga i lena taimi, le Afioga ia Tuisuga. E oo mai le aso lenei ia o lo o auauna lava, o se manatu taua mo lenei vaitau i le afaigaluega, e momoli atu ai le agaga faafetai i le Tina ia Kalameli Laban Collins ona o le auaunaga, 78 tausaga o le soifua ia ae o lo o galue mo lenei matagaluega. O le agaga faafetai, ia silafia e le Atua le faafetai i le auaunaga.

Ia lau Afioga i le Fofoga Fetalai, afe ane i si ou Itumalo o lo o taputapu ai e faauma ai se tala i lenei ituaso. I le afio o Alalagafa ma Galuanofu tau aga eseese ia Falealili, ia e faapito augafa se tala i le afio o Alo o Fanene afio le Matua ia Fanene ma lo outou toafa, ia afio foi le tou Tapaau Faasisina Tuisamoa, afio Salevalasi Tiavaasue ia faalufilufiga ia Lufilufi ma Taulauniu, Aiga Sa Alaimoana ia aea Suafa, alalatai le Aliioaiga ia Falealilimuli ma Talaolefale ma ona manu. Ia aemaise foi le paia o le Aiga Sa Talo, Talo o le magao ma le uso na toto tausia paia o le falefasa e afio ai ia Fonoti ma Teo ia aea le alalatai o lo outou toafa ma le lotoifale o le Manusamoa. E lagona a le agaga faafetai i le tapuaiga foi ma le nofo tatalo aea le afaigaluega paia a si ou Itumalo, malo le onosai malo foi le faapalepale. Ia, o le vaiaso fou amata ona tatou feiloai i le tapenaina o le tatou miliona lona lua ia ma faagasolo tatou galuega. Ia ae momoli atu foi le faalototele ia i latou e lei oo atu iai le tatou faasafua i le miliona muamua, ia o tapenaga e ao ona maioio. Ia ae tele meaalofo a le Atua mo le tatou Itumalo.

Ia e faauma ai se tala lau Afioga, ia faafetai tele lenei Maota mo le avanoa o lenei Matagaluega, faafetai i faauluuluga o matagaluega i la outou galuega. Aemaise lava lenei Sector lau Afioga Lefao ma tatou faauluuluga ia malo le galulue, ia o le tatalo a masani pei o le tatou fonofono o le Atua e faamanuia. O tupe ma mea, ia na ona fesoasoani i le tatou soifua a o le manuia sili e ala i le faamanuia i le Afioga i le Palemia ma le Kapeneta. Manuia lenei fonofono, manuia Samoa taputapu, faafetai.

FOFOGA FETALAI: Faafetai, malo saunoa i lau Afioga i le Minisita, ia e ui lava i le tatou taimi a o lea lava sa tuu atu le avanoa leaga e faigata ia si ou Itumalo. Ae malo saunoa o lea foi ua faapupula nisi o tulaga sa finagalo iai le tatou Maota ia malo a saunoa faafetai foi mo le faamalalamamaga.

Ia talu ai o lea ua tatou oo mai le tatou taimi manava ia o le a mafai ona faaaau saunoaga talifuaitau a le tatou Malo pe a aulia le aso a taeao i le alofa o le Atua. Ae ua faamalo le usufono i lenei aso i le paia o le Palemene, talosia ia i le agalelei o le Atua le aso a taeao e momoli atu iai lo outou soifua ma le ola e toe faaaau ai le tatou galuega. Faafetai foi i tapuaiga a Faauluuluga o Matagaluega ma Faalapotopotoga Tumaoti a le tatou Malo ia e le faaitiitia le taua, o lo outou foi auaunaga lagolago mo tatou taualumaga, faamalo le onosai. Faafetai Samoa i lau tapuaiga ua manuia faiva o lau Palemene i lenei aso ona o lau faanonogamanu, o le tatalo ia iai pea le agalelei o le Atua i si o tatou Atunuu.

Ae tatou te le i tolopo talosaga atu i lau Afioga i le Sui usufono Tamaitai mo Alataua Sisifo se i e saunia se tatou tatalo.

Tofa Ale Vena Ale: Lau Afioga i le Fofoga Fetalai faamolemole pe maua se avanoa.

FOFOGA FETALAI: Ia, o lea ua faaiu atu le tatou fono.

Tofa Ale Vena Ale: Ua ou tulai atu lau Afioga e faamanatu atu i lau Afioga sau saunoaga e faamanatu i le Maota o le Palemene nei tatou toniga uli uma e aloaia ai le tulaga o le aso a taeao mo le sauaina o Tina ma Tamaitai, lau Afioga ma le faaloalo lava, faafetai.

FOFOGA FETALAI: Ia faafetai faamanatu mai, ia tautuana le tatou laei uli mo le aso a taeao.

Ia tulai mai lau Afioga i le sui usufono mamalu e faauma mai le tatou fono i se tatalo.

Na tolopo Taualumaga a le Fono Aoa Fautulafono i le itula e 1:07 i le afiafi seia aulia le Aso 29 o Iuni 2023 i le itula e 9.30 i le taeao.